

OSARA

Kotiva aiqava ahasa auku soa

¹ Haau hoqareo Vaiqavano Kotiva naauavata vakavaka auku seo vakoa. ² Aukuseo vakovo haau vi entaa vakavano vaieva hampiqama vio vai-hao qumina vakaqai vauvo sa vo ahasavanovaka vauvo sonkira aru ahasavaqai noa namai ventaqara mantaaqa sovo vaua. Vi entaa vakavano minkima vauvo Kotia Maraquavano noa namai ventaqara ruvauvau ihao vaua.

1 Enta

³ Kotiva minkima kio: Aakikaane, kuvo Kotiva kunte io aakika vua. ⁴ Kotiva aakikoa kavovo soqe io vauvo raira sehao aakikoa voqaa vakeo sonkiraiqua voqaa vakoa.

⁵ Kotiva aakikooa auku ntehao, Isarama ivo, kivaseo sonkiraiqua auku ntehao, Entaqive, kua. Entamaqio vivio aakika vuvo vi entava hoqarenaa enta kaiqa vua.

2 Enta

⁶⁻⁷ Vi entaa konavuvanovaka mamanavuvanovaka noa namaiqaa qapuqio vauvo Kotiva kihao, Ruqema via viini oiniao noa namaivano miani variao avukana qaqi variae, kio. Minki kuvo Kotiva kunte io konavuvanovaka mamanavuvanovaka noa namaiqaahairo ruqema vio viini oini vauvo noa namaivano miani vauvo avukana qaqi vauvo ⁸ Kotiva qaqi vaua auku ntehao, Naauave, kua. Entamaqio vivio aakika vuvo vi entava kaara enta kaiqa vua.

3 Enta

⁹ Via qararaa Kotiva kihao, Noa namai miani vaiava vohaanaini okiniao aahara vakavano qovaama vio vaiae, kio. Minki kuvo Kotiva kunte io namaivano vohaanaini okinuvo aahara vakavano qovaama vio vaua. ¹⁰ Kotiva aahara vaka auku ntehao, Vakave, kivaseo namaivano vohaanaini oku vaua auku ntehao, Noa namaive, kua. Kotiva kavovo nai auku seo vako ahasava soqe io vaura.

¹¹ Minkima soqe io vauvo viaqaankaio Kotiva kihao, Vakavano vaiao viaqinkaio vo ahasa vo ahahsavano qampiqaaiaava qovaama variae. Vo usau vo usaувано kava iraaiavavaka, vo sakai vo sakaivan kava iraaiavavaka qovaa ianarove, kuvo Kotiva kunte io vi ahahsava vi ahahsava qovaama vio vaua.

¹² Vakaqinkaio qampiqe vau ahahsava qampiqoa. Vo usau vo usaувано kava irehao sa hampi kava iraraio, nai kavaqai iraqio vi vauvo vo sakai vo sakaivanovaka kava irehao nai kavaqai iraqio vi vaua. Minkimaqio vi vauvo Kotiva kavovo soqe io vaua. ¹³ Entamaqio vivio aakika vuvo vi entava kaaramo enta kaiqa vua.

4 Enta

¹⁴ Via qararaa Kotiva kihao, Naauaini ikaa ia ahahsava vo ahaha vo ahahsavano qovaama via hini ahahsavano entaqia ikaaia ahahsava vaiao hini ahahsavano aakikaainaqqaa ikaaia ahahsava variiae. Vi ahahsava vi ahahsava vaihao ntara uki entaave, ntara qantu ne entaave, koa ikaqio vio vuu kaiqaaina entaave, ihi kaiqaaina entaave, numiqaqio vuanaove. ¹⁵ Vi ahahsava vi ahahsava naauaini vii ntaka ikaqio vihao vakaini aakika

nimikaanarove, kio. Minki kuvo Kotiva kunte io aakikehao vaua.

¹⁶ Kotiva aakikaaina ahasaan noa kaaraqanta auku seo vakoa. suaivano aakikaainaaqaa ikaqio vuaie kio, auku seo vakeo koravano entaqia ikaqio vuaie kio, auku seo vakoa. Kotiva vikanta auku seo vakeo masauve, ovuroave, vahoquave, auku seo vakoa.

¹⁷ Kotiva vi ahadasava vi ahadasava vakaini aakika nimikaqi vuaie kio, naauaini auku seo vakoa. ¹⁸ Vi ahadasava vi ahadasava aakikaainaaqaavaka entaqi-vaka ikaqi vuaie kio, naauaini vi ahadasava auku seo vakoa. Sonkiraiqiava nariaraa vaiao aakikaaiava nariaraa variae kio, Kotiva vi ahadasava vi ahadasava auku seo naauaini vakoa. Kotiva kavovo nai auku seo vako ahadasava soqe io vaua. ¹⁹ Entamaqio vivio aakika vuvo vi entava kaaraqanta kaaraqanta enta kaiqa vua.

5 Enta

²⁰ Via qararaa Kotiva kihao, Vo ahasa vo ahasa qaqi vaiqio vuaia ahadasava noa namaiqi vi anicha mpiqaake. Vo uvii vo uviivano aka vare vi anicha naauainivaka mpiqaake, kio.

²¹ Minki kivaseo Kotiva noa aantauvahi noa namaiqi ni ahadasava auku seo aiqava vi ahadasava namaiqi qaqi vaiqio vuaina ahadasave, nana nana ahasa qasiaina ahadasave, vo ahasa vo ahasa auku seo vakeo, viaqaankaio vo aantau vo aantau aarosa vakaa aantauqaai auku seo vakeo. Auku seo vakeo Kotiva kavovo nai auku seo vako ahadasava soqe io vaua.

²² Kotiva vi ahadasava vi ahadasava soqema nimikeo kihao, Ne namaiqi vai aantausa suvuaramaqi vivo airiqihao namaiqi mpiqaiae.

Ne uviivanovaka suvuaramaqi vivo airiqiaie, kio.
²³ Entamaqio vivio aakika vuvo vi entava sauqu hiniu enta kaiqa vua.

6 Enta

²⁴ Via qararaa Kotiva kihao, Vakaqaa vo aantau vo aantauvano qaqi vaiqio vihao nuaie. Suvu vake aantauave, qaasau aantauve, koventive, memauve, aiqava aantauvahivano vo aantau vo aantauvano vakaqaa nuaie, kio. Minki kuvo Kotiva kunte io vi ahasava vi ahasava qovaama vio vaua.

²⁵ Kotiva qaasau aantau, vo aantau vo aantau auku seo, suvu vako aantaua, vo aantau vo aantauvaka auku seo, memauve koventive vo ahasa vo ahasavaka auku seo, vakoa. Kotiva kavovo nai auku seo vako ahasava soqe io vaua.

²⁶ Minkima vauvo Kotiva kihao, saiqe kenkanavu voqamaa vaiinki auku saaiao vi vaiinkiva vaihao noa namaiqi vaina hampusagaave, naauaini akaqi ni vaina uviiqaave, vakaini suvu vaina aantauqaave, qaasau aantauqaave, aiqava vi aantaua vi aantauqaave raqisiaie, kio. ²⁷ Minki kivaseo Kotiva vaiinki via nai voqamaa auku seo. Kotiva nai voqamaa qorainkivaka nahentivaka auku seo vakoa.

²⁸ Kotiva vikantaa quahama nimikeo kihao, Nekanta vahama vainki suvuaramaqi vivo airiqihama nikanta vainkiqaima vakamaaka mpiqa saake. Ke nikanta noaiqama saai noa namaiqi vai hampusagaave, naauaini aka vareo nina uviiqaave, aiqava vakaqaa vaina aantauqaave, nekanta visaqaa raqisiqi vuake, kio.

29 Kotiva minki kivaseo qaiqaa kihao, Aiqava ahاسavano iraaina kavaave, aiqava sakavano iraaina kavaave, ke vi ahاسaa nikanta nimiaio nikanta ntaraqaima varianarove.

30 Aiqava aantauvahivano vakaqaa vaiavave, aiqava aantauvano naauaini vaiavave, aiqava memau koventivano vakaqaa vaiavave, visa ntara vaieva aiqava sakai mareve usauve vusanaa vainaa, vi ahاسaa vi ahاسaa visa ntarama varianarove, kio. Minki kuvo Kotiva kunte io vaua.

31 Kotiva aiqava ahاسa nai auku seo vako ahاسaa kavovo voqama seo soqe io vaua. Entamaqio vivio aakika vuvo vi entava sauqu hiniu io hini sauquni vohaiqa enta kaiqa vua.

2

1 Minkuma seo Kotiva naauavata vakavaka aiqava ahاسavaka auku vuu kaiqa soa.

7 Enta

2 Kotiva sauqu hiniu io hini sauquni vohaiqa enta saiqa vaaqio vihao aiqava ahاسa auku vuu kaiqa seo. Vuu kaiqa seoa kio, via qararaa 7 entaqaa sa saiqa vararaio, noa horiaa vaua.

3 Kotiva saiqa vaaqio vihao aiqava ahاسa vuu kaiqa seo 7 entaqaa noa horiaa vauva kio, viva vi entaa 7 enta soqema amikeo, maa entava aahuva enta horiaa entama varianarove, kua.
4 Naauavata vakavaka auku so osarava minkima vaua.

Ideni vakaini

Noavano Kotiva naauavata vakavaka auku soa.

5 Ho hoqareo vi entaa Noavano Kotiva sa aaqu akikovoa kio, sa vusanaa vauahasava vauvo sa

suvu voqavaka qampiqovo sa vaka auvuu ntuva saaiava vauvo ⁶vakaqinkainaa namaivanoqai qovaama vio aiqava vaka pukaiqama sehao vaua.

⁷ Minkima vauvo Noavano Kotiva vaka vaaseo vaiinki auku seo nai qaqi vaiqio vuaina aihoa via aiqiana vuaqa sovo vaiinkivano qaqi vaiqio vi vaua.

⁸ Vaiinkivano minkima seo qaqi vaiqio vuvo Noavano Kotiva nai aukuko vaiinkia via vika vareo suaivano uinaini Ideni vakaini nai naaho ukukoaqi vuu soa.

⁹ Vi naahoaqi Noavano Kotiva kuvo soqe sakai vo sakai vo sakaivano qampiqeo vauvo via kava vaieva soqe sakai kava, ne kavava vaua.

Naaho avukaqi sakai kaaraqanta vaua. Sakai vovano qaqi vaie u sakaiva vauvo sakai vovano soqe saiqave manta saiqave kavare u sakaiva vaua.

¹⁰ Ideni vakaqinkaio namai vo qovaama vio vi naahoa pukaiqama saaia namaiva vaihao oku vihao naahoqankaio namaivano nkahivio kaaraqanta kaaraqantaqaa oku vua. ¹¹ Vi namaiva nkahivio hoqarenaa namai auku vaieva Pisoni Namai vaua. Pisoni Namaivano oku vihao Havila vakaqi virante airantemaqio vua.

¹² Havila vakaini soqe *kora* oi vauvo soqe nunka u ahassavavaka vauvo vaiinkivano vaakaiqi vau oiva soqe oivaka vaua. ¹³ Hoqarenaa namai auku Pisoni Namai vauvo via naankiara namai vo via auku vaieva Gihoni Namai vaua. Gihoni Namai Kusi vakaqi virante airantemaqio oku vio oku vi vaua.

¹⁴ Namai kaaraqanta minkima vi vauvo namai auku vo vaieva Taigarisi Namaivano vaua. Taigarisi Namai Asiria vakaqi suai ui vankaraini

oku vi vaua. Namai kaaramonavu minkima vauvo vinavusa naankiara namai auku vo vaieva Iufarekisi Namai vaua.

¹⁵ Noavano Kotiva vaiinki via vika vareo nai naahoqi Ideni vakaini vuu seo kihao, Maaqi vai-hama saiqa varehaama soqema sea ki naaho-qaa raqisiane, kio. ¹⁶ Minki kivaseo Noavano Kotiva mpeqaiqama seo vaiinki via kiva amio kihao, Aiqava sakai kava irainaa homa hiqi sea ne-hama ninaave. ¹⁷ Sakai vo soqe saiqvavaka manta saiqvavaka kavare i sakaia, vi sakaia kavaqaima sa naane. Ke qiomia vake uo. Ae via nea are qukuma vinaave, kua.

¹⁸ Noavano Kotiva kihao, vaiinki viva nariaraa vaivo sama soqe ivo. saiqe ke via saihaqiainaa nai voqaama vo auku amikaae, kio.

¹⁹ Noavano Kotiva minki kivaseo vaka vaa seo vakaqonkaio aiqava aantauvahi vakaqaa nusa auku seo, aiqava aantau naauaini nusavaka auku seo, visa visa ntika vareo vaiinki viva visa nuku vakaae kio, viva vaunaini vuu sovo vaiinki viva vi aantaua vi aantaua auku vakovo vaiinki viva vi kuntema seo visa nuku vaieva minkima vaua.

²⁰ Vaiinki viva visa nuku vakaqio vihao aiqava vakaini suvu vau aantauave, qaasau aantauve, aiqava naauaini vii ntaka akaqio nu aantauave, viva aiqava visa visa nuku vakao. Vaiinki viva minkimaqio vuvo sa visaqinkaio vaiinki nai vo-qavaa via saihaqiaiava vaua.

²¹ Nai voqaava via saihaqiaiava sa vauvoa kio, Noavano Kotiva vaiinki via vaika sovo vaika aavaka vuvo vaiinki via aantea vonku nkaqu seo maki qaiqaa kinka koa. ²² Noavano Kotiva aantea vaiinkiqinkaio nkaqu soa viaqo nahenki auku seo

nahenki via vika vareo vaiinki viva vaunaini vuu
sovo ²³ vaiinki viva via kaveo kihao,
Hove, viva ki voqaavama vaio ivo.

Via vuhaai ki vuhaai vohaaqaamama vaio ivo.
Via makivaka ki makivaka vohaaqaamama vaio
ivo.

Viva ki vaiinkiqaankaio vaa saiaa ki,
ke viaa nahenkive ki uo, kio.
Minki kivaseo kuama.

²⁴ Kotiva minkima auku amikooa kio, vake maa
entaa vaiinkivano nai nosa qosa mini seo nai
naakantio qampama vivo vikanta vaaka vaieva
vohaa vaakaqaima vaio.

²⁵ Vaiinki vivavaka via naakavanovaka vauvo
vikanta ukavaaqa sa vaumanka kosa vahama sa
sauhiha vaua.

3

Vaiinkivano Kotia uva raqa soa

¹ Noavano Kotiva aiqava aantau auku seo
vakoaqinkaio memauvano voqama seo uqeraa
uva ki vauva vahao nahenkiaa kihao, Quqaae
Kotiva nikanta qio kivakehao aiqava sakai kava
maa naahoaqi irainaa sa naake kiva kaiave? kio.

² Minki kuvo nahenki viva memauua kihao,
Kekanta aiqava sakai kava maa naahoaqi irainaa
homa naraave. ³ Naaho avukaini vai sakaia vo-
haiqa via kavaqaima Kotiva kikantaa kihao, Sa
naake, sa uku varaaake. Nekanta vi kavaa uku vare
namase quku vivaave, kiva kaiave, kio.

⁴ Minki kuvo memauvano nahenkiaa kihao,
Aqao, nekanta sama quku vivaave. ⁵ Nekanta
nama saivo nikanta avu aako kenko kiama
nekanta soqe saiqvavaka manta saiqvavaka ho

kavehama vaiqa voqaama vaivaave. Kotiva viaa iihao nikantaa sa naake kiva kaiave, kio.

⁶ Memauvano minki kuvo nahenkivano vi sakaia kavovo soqe sakai kava irakovo saiqe aiqava saiqa ho kavaae kivaseo sakai via kava hiqi seo neo. Nehaoma hini nai vaakivaka amio. Amuvoma vivavaka neo ⁷ vikanta nama sovo vikanta aako kenko kumanka náikanta vaaka kavovo kosama vaumanka sauha vikanta ou maua raqase irase rumpake vaua.

⁸ Vikanta vaiha iuvo eroaqi Noavano Kotiva vi naahoaqi kuvu ni vaumanka vikanta ou sakai avukaini quqekavi viaqi vauvoma ⁹ Noavano Kotiva vaiinki via aareo kihao, Ae kaaqie variarao? kio.

¹⁰ Minki kuvo vaiinki viva kihao, Ae naahoqi kuvu nihaama kunkusai kianaa iima ke kosa vai-haa kima, qeke maini ani quqekavi vai uo, kio.

¹¹ Vaiinki viva minki kuvo Kotiva kihao, Kavave ai vaakaa kosama vaio ivo kivaae are quqeka vuaraao? Ke qio kivakauna sakai kavaae are nama saaraao? kio.

¹² Minki kuvo vaiinki viva kihao, Ae nahenki ki kimiavama, vivama sakai kava hiqi seo kivaka kimimanka ne uo, kio.

¹³ Minki kuvo Noavano Kotiva nahenkiaa kihao, Ae nanaiqamae varaarao? kuvo nahenki viva kihao, Aqao, memauvano kiriara una uva kimanka ke sakai kava hiqise ne uo, kio.

¹⁴ Minki kuvo Noavano Kotiva memauua kihao, Ae una uva kinaa saara are aiqava aantau-vahiqinkaia mantaiqama vinaave.

Via saara are konkoma ntaka vaihaama auhanai-hiaqaima ninaave.

Minkimaqia nihaama konkoma namaqia vihaama quku vinaave.

¹⁵ Ae suvuara iavavaka nahenkivano suvuara iavavaka vikanta navukaiqiha vaiqi viavaave.

Naankiara nahenkivano suvuara iava vovano ai qiaka rakavu saiaa are via aiqu akaa nkaqa senaave, kio.

¹⁶ Minki kivaseo Kotiva nahenkiaa kihao, Ai voqama seo aiha vi vaiaa vainki vakaqi vinaave.

Are vainki vakaqi vio aiha vi vaiaama vakenaave. Ai antuqavano ai vaakiarama vaio viva aiqaa raqisiqio vuaie, kio.

¹⁷ Minki kivaseo Kotiva vaiinkiaa kihao, Are nena naaka uva iihaama ke qio kivakauna sakai kavaa nama saaraoa kio, via saara vakavano mantaiqama vuunarove.

Are vakaini vaiqia vina entaama vusaai ukihaama ntara uku namaqia vinaave.

¹⁸ Numii vankusavano uisuma vi vaiaa are hasaqi ntaravano qampiqainaqaqai namaqia vinaave.

¹⁹ Ai koqaavu nte vaiaa ntara uku namaqia vivia vuu quku via qaiqaa qoqaraanaini vakaqi vinaave.

Ke vakaqonkai ai kaaqau kauaa variaavave.

Are quku viama qaiqaama vakaiqama vinaave, kio.

Minki kua.

²⁰ Nahenkivano aiqava vo vakanaa vo vakanaasa visa nova variaiava vauaa kio, vaiinki viva nai naaka auku ntehao Evaave, kua.

²¹ Noavano Kotiva aantau paka vaaseo viagonkaio ukavaaqa auku seo vaiinkivaka via

naakavaka nimumanka vikanta via aankaumake vaua.

Noavano Kotiva vaiinkivaka nahentivaka naa-hoqinkaio aaqaini nikikama soa

²² Noavano Kotiva kihao, Ho kavaane. Vaiinkivano kinavu voqaiqama vio vaihao soqe saiqavaka manta saiqavaka kave vaiva vaio ivo. Viva nai sauqu kukuseo vo sakai kava, qaqi vaiqio vuaina sakai kavaa hiqi seo nama seo aiqava enta qaqi vaiqio vuanto, kio.

²³ Minki kivaseo Noavano Kotiva vaiinkiaa kihao, Ke ai vakaqonkai kaaqau kauava are aaqaini vaihaa vakaqai auvuu ntuvaqia vinaave, kivaseo Ideni naahoqinkaio akikama sovo aaqaini vuama.

²⁴ Noavano Kotiva vaiinkivaka nahentivaka vikanta nikikama somanka aaqaini vuvo Ideni naaho hini vankaraini suai avu uunaini vinavusa maintainaraa raqisiake kio, enseli impeqanavu mini somanka vaua. Qaqi vaiqio vuaina sakai kavaa vaiinkivano hiqi seo naanto kumanka vinavusa mini maintainaraa raqisiha vauvo iha ilko saavuvavaka aea aea ihao mini vaua.

4

Keniva Abelia aru soa

¹ Adaamuva nai naaka Evaasantio ni yauvoma Evaava vainki kaiqama vio vuu qorainki vainki vakaseo via auku ntehao, Keniave, kio. Viva kihao, Noavano Kotiva ki saihaqimanka ke qorainki vainki vakase uo, kio.

² Minki kuvo via vainkivano nouqama vuvo qaiqaa vainki kaiqama vio vuu via qaka Abelia

vakaseo. Abelia via vakasovo nouqama vio Abeliva viva sipisipiqa raqisi vauvo via vasaava Keniva naaho saiqa vaehao vaua.

³ Minkimaqi vikanta viha Keniva nai naaho-qinkaio ntara qantu vareo vuu Noa Kotia amikeo.

⁴ Amikovo Abeliva nai sipisipi vovano hoqare vakako naakia vonku aru seo via keqa seo maki soqera vareo vuu Kotia amikoa. Vikanta minkimase Noa Kotia amikovo Noavano Kotiva Abelia quahama amikeo, Abeliva sipisipi aru amikoa viavaka quahama amikeo, ⁵ Kениavaka, Keniva ntara amikoavaka, sa Noavano Kotiva quahama amikeo. Sa quahama amikovo via saara Kenia arara ikovo ua vii arakeo komaseo vaura.

⁶ Keniva ua vii arakeo komaseo vauvo Noavano Kotiva Keniaa kihao, Nana saarae ai arara ikaivaa variarao? Nana saarae are ua vii arakea variarao? ⁷ Are soqe saiqa varaiea, ke homa ai quaha amikaraave. Are sa soqe saiqa varaiea, manta saiqvano qentiana vaara aukuke vaihao ai ravaaqau saanaove. Manta saiqvano ai ravaaqavu saantoa, are mpeqaiqama sea manta saiqa aakara saane, kio.

⁸ Noavano Kotiva minki kuvo Keniva sa via uva iiaio vaio nai qakaa kihao, Varaiqekanta qaqi aaraini ou nuae, kivaseo nai qaka vika vareo vio vuu Keniva nai qaka Abelia ahasaqi aru seo.

⁹ Aru sovoma Noavano Kotiva Kenia ireo kihao, Ai qakavano Abeliva kankoe vaio ivo? kio. Minki kuvo Keniva kihao, Ke sama via kave uo. Sa ke kenka qakaqaa raqisi vauausavauve, kio.

¹⁰ Minki kuvo Noavano Kotiva kihao, Are nana ahasee varaaraao? Ke kavauo ai qaka naarevano vakaqaa hiqintivea ke are nena qaka aru

saanaa saara ¹¹ ai mantaiqama amikareave. Are nena qaka aru saarao via naarevano ntehao vakaqi okiqekaia saara vakavano sama ho ai sahaqianaove. ¹² Are ntara uku keava sama soqema seo qampiqaanaove. Are sa vohaa vakaqaa ho vainaave. Are saku varea hampiqama sea vo vaka vo vakaqaa vaiqia vinaave, kio.

¹³ Noavano Kotiva minki kuvo Keniva kihao, Oho, are noaiqama sea ki kikiavea ke via saara sa ho qaqi vaiaave. ¹⁴ Are maa vakaqaankaia ki kikikavea ke sa ai avuqaa ho vaiaave. Ke saku vare vo vaka vo vakaqaa hampiqamavi ni variaiao vo vaiinkivano ki ranta saaiava ki haru saanarove, kio.

¹⁵ Keniva minki kuvo Noavano Kotiva aqao kio. Save, vovano ai aru saiea, ke vaiinki 7 navu aruse aqaa vuntu saraave, kio. Minki kivaseo vovano Kenia ranta seo via aru saanto kio, Noavano Kotiva vira vaakaqaa vusa voqaama qara ntuva koa.

¹⁶ Minkia sovo Keniva Kotia avuqaankaio saku vareo Ideni vakaihaiio suai avu uuentonaini, Noti vakaini vaieva vuama...

37

Iosepeva kaira kavo

¹ Kanaha vakaini nai qova vaiqi vu vakaraqaa Iakovovavaka vi vakaqaa vaiqi vua.

² Iakovo vaiktinavu uva maankimama vaio: Iosepeva qaraasa vaiinkivano 17 ihi vaaseo vaihao nai vasausavaanavu hampaka vaihao sipisip-iqaavaka, mimigaavaka, raqisi vaua. Via qoa naakakanta Bilihaasa Siripaasa vaiktinavu hampaka vi quararaqaa raqisio viaqankaio Iosepeva

vuu nai qoa kiva amio kihao, Ki vasausavaanavu manta saiqaqaima vare variavo, kio.

³ Via qova Iakovova via vo auku Isiraiva, viva sontaiqama vuva Iosepea vaka kovaa kio, viva aiqava nai vainkinavuqinkaio Iosepeaa voqama seo antuqa auvo vaihao viaa quahehao suaharavano via aruanto kio, vaaqa soqera auku seo via amio. ⁴ Via qova vaaqa soqera Iosepea auku amumanka via vasausavaanavu vaaqa via kave kiha, Oho, kinavu qova Iosepeaaqai antuqa aivaro vaio ivo, kivase visa via saara Iosepeaa nirara ikomanka vaiha sa viaa soqe uva kiai, via koma amikoa.

⁵ Vika minki vauvo vo enta Iosepeva kaira kaveo viaqaankaio kaira kavoa viva nai vasausavaanavu kiva nimumanka via saara via vasausavaanavu Iosepeaa voqama seo nirara ikomanka vaua. ⁶ Iosepeva visaa kihao, Saiqe ke kenka kaira kavaaina osaraa ni kiva nimiae. ⁷ Kenavu naahoqi uiti rumpase vauo viaqaankaio ke uiti rumpa kauava himpi vaaviarama vio vaimanka nenavu uiti rumpa kaasa visa ke rumpa kaunaa ukukumavi vaiha ke uiti rumpa kaunaa quaha amikeha ravenkavi variaave, kio.

⁸ Iosepeva minki kumanka via vasausavaanavu kihao, Oho, are manta kairahaama kavaaraao. Are vi kairaa kavaanaa iihaama are kihaa, Ke visaqaa raqisieave, kioave, ki. Minki kivase visa Iosepeva kaira kavoa saaravaka, Iosepeva visaa ku uvaa saaravaka, visa Iosepeaa voqama seo nirara ikomanka vaua.

⁹ Minkima vauvo Iosepeva qaiqaa kaira vo kaveo nai vasausavaanavuaa kihao, Ke qaiqaa

kaira vo kave uo. Ke vaiha kavauamanka suaivanovaka, koravanovaka, masau ovuroa 11 navuvanovaka, vinavusa ravenkavi vaiha ki quahama kimike vaiavo, kio.

¹⁰ Iosepeva vinavusa kiva nimio viaqaankai nai kaira kavoaa nai qoavaka kiva amuvo via qova Iosepea akihao kihao, Oho, are manta kairahaama kavaarao. Are kaira kavaanaa iihaa kihaa ki novavaka ki vasausavaanavu vaka ki qovavaka ravenkavi vaiha ki quahama kimikevaave kioave, kio.

¹¹ Minki kumanka Iosepea vasausavaanavu via saara nirara ikomanka Iosepea koma amike vauvo via qova vi uvaa iiqio vihao aako ukihao vaua.

*Iosepea vasausavaanavu Iosepea vo vakanaasa
nimihā soqaa varoa*

12 Vo enta Iosepea vasausavaanavu visa nái qoa sipisipi vika vare Sekemini ou vaiha sipisipiqa raqisi vauvo ¹³ Iakovova Iosepeaa kihao, Are nena vasausavaanavu sipisipiqa raqisinaini Sekemini vuane, kio.

Minki kuvo Iosepeva kihao, Ke mini viea henuqamase vai uo, kio.

¹⁴ Minki kuvo via qova kihao, Ai vasausavaanavu hoe variavo, sae ho variavo? Are visa ou kavea vii ki kiva kimiane, kio. Minki kivaseo via qova Iosepea akikovo viva Hebaroni kaaqi ntaka vua.

¹⁵ Iosepeva ou vio Sekemini ou nteo nai vasausavaanavuua qumina rante hao vi ani vauvo vo vaiinkivano via kaveo kihao, Nana ahasaae rante variarao? kio.

¹⁶ Minki kuvo Iosepeva kihao, Ke kenka vasausavaanavu sipisipiqa raqisiasaama rante vai uo. Are visa vuنانiaa iianaave? kio.
¹⁷ Iosepeva minki kuvo vaiinki viva kihao, Visa vaasama maihai vuavo. Ke iiua visa kiha, Dotaani kaaqi ntaka vieave, kiaave, kio. Minki kuvo Iosepeva nai vasausavaanavu ntakaqio vio Dokaanini ou nteo kavomanka visa mini vaua. ¹⁸ Iosepeva aumanko ou ntomanka via vasausavaanavu vukuni vuku via kave visa via arusea nai kiva ami nai kiva amiha vaua.

¹⁹ Visa kiha, Oho, kaira kave vai vaiinkiva ani vaio ivo.

²⁰ Saiqe kenavu via aruse namaiaa vaka quvukaavo aaharaiqama viaqi via vaaka vaavi aqu saae. Kenavu via vaaka viaqi aque viaa qaasau vairivano aru seo ivo kiae. Kenavu minkiaio viva kaira kavaiaava quqaae varianaroe, sae quqaa vi vaua varianarove? kinka.

²¹ Visa hini usa minki kuvo Rubeniva visa uva iio visa Iosepea arusevoave kivaseo visaa aqao kio, Saiqe kenavu sa via arusaae. ²² Kenavu sa via arusarai namaiaa vaka quvukaavo aaharaiqama viaqi via qaqi aqusaae, kio. Viva visaa minki kivaseo viva nai iiseo kihao, Ke naankiara via ruaruamase viaqaankai nai qova vainaini vika vare vuu saraave, kio.

²³ Rubeniva minki կumanka visa vauvo Iosepeva ani ntomanka visa via ravaaqause via vaaqa soqera via vaakaqaankai ravaqaase qaqini se ²⁴ Iosepea vikavaare munku haau namaiaa quvukovo aaharaiqama vuaqi via aqusoa.

²⁵ Visa Iosepea viaqi aque viaqaankai visa ntara naesa oquvi vaiha vukuni vuku kavomanka

Isamaia vakanaasa Gileaati yakusaihai ani vaua. Vi vakanaasa airi aiaia soqe untavu ahasaave, ntaraqaa hiasaa u ahasaan aakakoave, vi ahasaan vi ahasaan visa nái kameriqaa rumpa vare Isipini vuu nimiha soqaa varesa ani vaua. ²⁶ Ani vauvo Iutiva nai qaka vasausaa kihao, Kenavu kenkanavu qaka aruse via arusaainaa uva quqeka saainaqaankaio sa kinavu saihaqiaina ahasava qovaama ianaove. ²⁷ Saiqe sa kenkanavu sauquqonkai Iosepea airai vaiai, Isamaia vakanaasa aniqe via visa nimiai visa soqaa kinavu kimiake. Kenavuvaka vivavaka vohaa vaiinkima vai uo. Kenavu via aru saaoave, kio. Iutiva minki kumanka via qaka vasausa hove kumanka ²⁸ Isamaia vakanaasave Midiani vakanaasave, visa anumanka Iosepea vasausavaanavu namaiaa quvukoaqi via aqu soaqinkai via qaqlini vaa vaaise, Isamaia vakanaasa Iosepea nimihama 20 *silvaa* munima varomanta vi vakanaasa Iosepea vika vare vuu Isipini soa.

²⁹ Vi vakanaasa Iosepea vika vare vuvo Rubeniva ounteo namaiaa quvukoaqi ani kavovo Iosepeva viaqi sa vauvo via saara via munkusa mantaiquo oho kivaseo nai ukakaai naahu seo ³⁰ ou nai qakanavuaa kihao, Ke kavauo Iosepeva sa viaqi vaio ivo. Oho ke nankie iaave? kio.

³¹ Minki kumanka vinavusa Iosepea vaaqa qaqlini rahunku soa vare mimi vo aruse Iosepeva vaaqa mimi naare viaqi quntamase vare ³² anirante visa vuu nái qoa umiqeha kiha, Kenavu maa ahasaan ranta sauna are aikukiha kavaane. Iosepeva vaaqae vo vaiinki vaaqae vaio

ivo? kinka.

³³ Vinavusa minki kuvo visa qova Iosepea vaaqa uqauama seo kaveo kihao, Oho, maa ki maaqu Iosepea vaaqave. Qaasau vairi vovano via aruseo nama seo ivo. Quqaama qaasau vairivano via aruseo via vaaka keqaaqama seo ivo, kio.

³⁴ Iakovova minki kivaseo nai ukakaai nahaqu naahaquma seo manta ukakaaiqai ankaumasero airi enta vaiqio vihao nai maaquaa iq'i rakaqio vi vaua. ³⁵ Via maaqu hini usavaka via raavuanuvaka via munkusa susuqama amikaae kuvo Iakovova sa visa ku uvaa iio. Viva aqao kio, Ke kenka maaquaa iihama qaqi iq'i rakaqi vivi vuu quku viaave, kivaseo nai maaquaa iq'i rakaqio vi vaua.

³⁶ Mintuvo Midiani vakanaasave Isamaia vakanaasave, visa Iosepea vika vare Isipini ou vaiha Iosepea Potipaa amihama munima varoa. Potipaava noa vaiinkivano vaihao viva iqosa vaiinkinavuqaa raqisi vaumanka visa Pero vaiinki naavu noa naavuqaa raqisi vaua...

39

Iosepeva Potipaa saiqa varoa

¹ Isamaia vakanaasa Iosepea vika vare Isipini ou vuvo mihainaa vaiinki vovano Potipaava visa munima nimiha Iosepea varoa. Potipaava noa auku vakaa vaiinkiva iqosa vaiinkinavuqaa raqisi vaumanka visa Pero vaiinki naavu noa naavuqaa maintaraa raqisi vaua.

² Isipi vakanaa vaiinkivano munima aquseo Iosepea varovo Iosepeva Potipaa saiqa vaehao via naavuqi vauvo Noavano Kotiva Iosepea

sahaiquvo Iosepea saiqvano soqe saiqa vaua.
³ Iosepeva soqe saiqa vare vauvo Potipaava kavovo Noavano Kotiva Iosepea saihauvoa kio, Iosepea saiqvano uikareo vauvo ⁴ Potipaava Iosepeaa quahaseo via noaiqama seo kihao, Are ki naavuqi saiqa varehaama aiqava ki saiqa ahasaqaa raqisiane, kio. ⁵ Potipaava minki kivaseo Iosepea noaiqama sovo Iosepeva aiqava via saiqaqaa raqisi vauvo vi entaaqaankaio Noavano Kotiva Iosepeaa iihao Potipaa soqema amikovo Potipaava ntara ukukovave, soqaa saiqa varoave, soqe io vaua.

⁶ Minkima vauvo Potipaava Iosepeaa kihao, Are aiqava ki saiqaqaa raqisiqia vuane, kuvo Iosepeva aiqava via saiqaqaa raqisiqio vi vauvo Potipaava sa nai saiqa airi aako iiaio, homa Iosepeva vi saiqa varaanavae kihao viva qaqi vaihao ntaraqai nehao vaua.

Minkimaqio vuvo Iosepeva soqe vii vaaka vakaa vaiinkivano vaihao Potipaa saiqaqaa raqisi vauvo ⁷ viaqaankaio Potipaa naakavano Iosepea kavovo munkusa ntovo viaa avu akihao Iosepeaa kihao, ania kintia vaikaane, kio.

⁸ Minki kuvo Iosepeva aqao kio, Ke maa naavuaqi vaiha via saiqaqaa raqisi vauoa kio, ki noa vaiinkivano Potipaava sa maa saiqaraa airi aako iivo. Viva ki noaiqama saimanka ke aiqava via saiqa ahasaqaa raqisi vai uo. ⁹ Ke via aana ntavavi sema maaqi vaiha via saiqaqaa raqisi vai uo. Potipaava sa vo ahasa ki qioma kiva keo ivo. Are via naakavano variaaroa kio, viva ariaraqai iihaoma ki qioma kiva keo ivo. Via saara ke manta saiqa vaeha Kotia uva raqa saaoave, kio.

10 Iosepeva minki kuvo vi nahenkiva vo enta vo enta Iosepea aare vauvo Iosepeva sa via uva iiaio, sa viva vaunaini ou vaua.

11 Vo enta sa vi naavuaqi saiqa vaiinkie saiqa nahenkie vonavu vauvo Iosepeva naavuqi saiqa vaaeva oiqekovo **12** Potipaa naakavano Iosepeva vaaqa ruvukoa ukukeo kihao, Are kintia vaikaane, kuvo Iosepeva nai vaaqa viquseo vi nahenkia sauquqi via mini seo vahaaqaini veva nteo santama vuā.

13 Iosepeva santama vuvo vi nahenkiva kavovo Iosepeva nai vaaqa via sauquqi seo naavuqinkaio santama vuvo **14** vi nahenkia voqama seo arara ikovo naavuqi saiqa varosa naarama seo visaa kihao, Ho kavaake. Ki vaakivano Hiparu vakanaa vaiinki maa vika vareo kinavu naavuqi vii saivama, viva ki mantaiqama kimikaeva auki vaio ivo. Viva maaqi oiqekeo kintio nuae kimanka ke oi aai kuaoma **15** viva ke oi aai kunaa iio qekeo nai vaaqa maini seoma aiqu aukuseo vahaaqaini veva nteo santama vivo, kio.

16 Minki kivaseo Iosepea vaaqa qaqi vakeo nai vaaki vesa vauvo Potipaava via vaakivano anuvo **17** viva vaaqa via nai vaaki umiqehao kihao, Hiparu vakanaa saiqa vaiinki vika vii saarava, vivama ki mantaiqama kimikaeva auki vaio ivo. **18** Viva ani ki uku varaimanta ke oi aai kuaoma viva qekeo nai vaaqauka maini seo naavuqinkaio veva nteo santama vivo, kio.

19 Via naakavano una uva minki kuvo Iosepea noa vaiinkivano Potipaava nai naaka uvaa quqaa uvave kio via arara ikovo **20** ou Iosepea ravaaqa vareo karavusaqì vuu soa. Vi naavuaqi Pero

vaiinki uva raqaso vaiinkisa vauaqi Iosepea karavusa amikovo Iosepevavaka viaqi vaua.

21 Viaqi vauvo Noavano Kotiva via saihapi vauvoma kio, karavusa naavuqaa raqisu vaiinkiva Iosepea soqema amikoa. **22** Karavusa naavuqaa raqisu vaiinkiva Iosepeaa quahehao via noaiqama seo aiqava karavusa vaiinkiqa raqisiane kio. **23** Minki kuvo Iosepeva vi saiqa vare vauvo Noavano Kotiva via sahaiquvo Iosepea saiqvano uikarovo karavusa naavuqaa raqisu vaiinkiva sa Iosepea saiqa airi aako iiaio, viva Iosepeaa kihao, Viva nai homa vaihao vi saiqa varaanarove, kivasehao vaua.

40

Iosepeva vo vaiintikanta kaira kavoa via osara naikanta kiva nimua

1-3 Iosepeva karavusa naavuqi vaiqio vuvo vo enta Isipi vakanaasa kave vakaava Pero vaiinkivano nai saiqa vaa amiko vaiinki vokanta vo uva saara vikanta karavusa nimikoa. Via saiqa vaiinki vovano Pero vaiinki namaiamu vaiinkiva vauvo via saiqa vaiinki vovano Pero vaiinki mpereti nunke vau vaiinkiva vaua. Pero vaiinkivano vikanta karavusa nimikovo Iosepeva karavusa naavuqi vaumanka vikantavaka viaqi ou vaua.

4 Pero vaiinki naavuqaa maintaraa raqisu vaiinkisaqaa raqisuva vi naavuaqaavaka raqisihaa Iosepeaa kihao, Are qaraasa vaiinkikantaqaavaka raqisiane, kuvo Iosepeva vi vaiinkikantaqaavaka raqisi vaua.

Minkima seo raqisi vaumanka vikanta karavusa naavuqi vaiqi vuvoma airi enta aikaromanka ⁵ Pero vaiinki namai amu vaiinkivavaka, Pero vaiinki mpereti nunke vau vaiinkivavaka, vikanta vohaa enta entaqi vaikeha kaira kavoa. Vovano vo kaira kavovo vovano vo kaira kavoa.

⁶ Vikanta kaira kavovo via qararaa koqaqi Iosepeva vikanta vauaqi ou nteo kavovo vikanta munkusavano mantaiqumanka viaqi vaua.

⁷ Vikanta munkusavano mantaiqumanka vauvo Iosepeva vikanta ireo kihao, Nekanta nana saarae ua vii arake variavo? kio.

⁸ Minki kumanka vikanta kiha, Kekanta entaqi kaira kavaunaa sa via osara ii uo. Kaira osara kikanta kiva kimiaiava sa maini vaio ivo, kinka. Vikanta minki kuvo Iosepeva kihao, Kotiva vaiinki saihaqivoma viva kaira osara ho iiave. Nekanta kaira kavea ki kiva kimiqe iriae, kio.

⁹ Iosepeva minki kuvo Pero vaiinki namai amu vaiinkiva viva naane nai kaira kavoa Iosepea kiva amio kihao, Ke vaikeha kaira kavauo ki kivuqaa uaini santavano vaiave. ¹⁰ Vi santava qampiqehao vaimanka via saqi kaaraqanta vohaiqa vaviestava saqqaankaio kava irakaivo aquika vimanka ¹¹ ke kave via hiqise vi kavaa kakise vi namaira kapaqi vare vuu Pero vaiinki sauquqi ami uo, kio.

¹² Minki kuvo Iosepeva via nai kiva amio kihao, Are kaira kavaunaa via osara minkimama vaio ivo: Saqi kaaraqanta vohaiqa vaviestava kavaunaa via osara vaieva kaaramo entama vaio ivo. ¹³ Enta kaaramonavu aikaraiaoma Pero vaiinkivano qaiqaa ai aarama saiaa are via saiqa varehaama haau vara vuu amianantema sea,

qaiqaama are via kapa nai sauquqi vuu aminaave. ¹⁴ Are qaiqaa soqemavi vaihaa Pero vaiinki saiqa varehaama kiriara kauru seoave. Are kiriara iisehaama kiriara Pero vaiinki kiva amiao viva ki karavusa naavuqinkai rahunku saaie. ¹⁵ Haau ke Hiparu vakanaa vaiinkivano kenka maaqaini variavau ki muara rarau vare maini anuave. Ke maini vaiha sa manta saiqa vararai variavauo qumina una uva saara ki karavusa naavuqi saimanka vai uo, kio.

¹⁶ Iosepeva minki kuvo Pero vaiinki mpereti nunko vaiinkiva kavovo Iosepeva vo vaiinki kaira osara soqema seo kiva amuvo vivavaka Iosepea kiva amio kihao, Kevaka kaira vo kave uo. Ke kaaramo kanunavuqi mpereti ntuvase kenka qikaqaa vaa aquvare ani uo. ¹⁷ Ventaqaara vai kanuaqi Pero vaiinkiaa nunka kauna mpereti, vo mpereti vo mpereti vaimanka uviinavu ani vi kanuaqinkai mpereti varase ne variaave, kio.

¹⁸ Minki kuvo Iosepeva vi vaiinkia nai kiva amio kihao, Are kaira kavaana osarava minkimama vaio ivo: Kanu kaaramonavu vaia via osara vaieva kaaramo entama vaio ivo. ¹⁹ Kaaramo enta aikaraiao Pero vaiinkivano karavusa naavuqinkaio ai vikeo ai aunta keqaseo ai vaaka sakaiqaa arukaaio uviivano ani ai vaaka maki nama saanarove, kio.

²⁰ Iosepeva minki kuvo enta kaaramonavu aikarovo Pero vaiinkivano kihao, Ki vakai entava qovaama vivo, kivaseo vi entaa quahehao nai sena noa vaiinki naarama seo ntara nimio karavusa naavuqinkaio viva nai saiqa vaiinkikanta via namai amu vaiinkiavaka, via mpereti nunke vau vaiinkiavaka, vikanta ntika

vareo noa vaiinkinavu ntara nonaini vuu seo. ²¹ Vuu mini seo via namai amu vaiinkiaa kihao, Are qaiqaa qaqi ki saiqa varenaave, kuvo vi vaiinkiva qaiqaa namai kapa Pero vaiinki sauquqi vakovo ²² Pero vaiinkivano nai mpereti nunke vau vaiinkia aruseo Iosepeva kuntema seo, via vaaka sakaiqaa arukoa.

²³ Minki uvo Pero vaiinki namai amu vaiinkiva qaiqaa Pero vaiinki saiqa vaehao sa Iosepeaa iiaio, via kauru soa.

41

Pero vaiinkivano kaira kavoa

¹ Iosepeva karavusa naavuqi qaqi vaiqio vuvo ihi kaaraqanta aikarovo Pero vaiinkivano entaqi vaikehao kaira kavoa. Viva kaira kavova maankimama vaio: Pero vaiinki maraquavano Nairi Namai hini vantaraini auhianta himpiko vahao kavomanka ² vi namaiaqinkai vurimakaua soqesa 7 navu qovaamavi namaiqinkai vaainte ou namai auhianta vaiha usau ne vaua. Vi vurimakauanavu soqe vaaka vakausa noa hauntivano vaiha usau ne vaua. ³ Ne vaumanika via naankiara namaiqinkai vo vurimakaua 7 navu qovaama vua. Vinavusa sa vaakavaka vausa, vuhaaiqai vausa namaiqinkai vaainte ou vurimakaua soqesa hampaka vaiha ⁴ visa aruse nama soa. Minkuvo Pero vaiinkivano kaira via kaveo vaikonaihaiio himpio.

⁵ Pero vaiinkivano himpio viki vii kaveo qaiqaa vaika vio kaira vo kaveo. Viva kaira vo kavova maankimama vaio: Via maraquavano kavovo *sankuma* voqaama vauvo via veha vohaiqaankaio noa 7 navu soqera irakeo

mpeqaiqama vio vaua. ⁶ Noa soqe 7 navu minkima vauvo via naankiara vo *sankuma* voqaama irakeo noa 7 navu irakovo suaivano noaiqamaseo ike vauvo uvaivano iha voqaama ukihao via kakoqa aqu sovo sa soqe kava irakoa.

⁷ Sa soqe kava 7 navu irakova ou soqe kava 7 navu irakoa nampiqama soa. Minki uvo Pero vaiinkivano vaikonaihaio himpio kihao, Oho, ke kairama kave uo, kio.

⁸ Minki kivaseo via qararaa koqaqi Pero vaiinkivano nai kaira kavoa saara aako ukihao vaihao Isipi vakanaa vaiinki vo osara vo osara kavosavaka, vaana saiqa vare vau vaiinkinavusavaka, visa naarama seo viva kaira kavoa visa kiva nimumanka visaqinkai sa vovano via kaira osara sankunka seo ho kiva amiaiava vaua.

⁹ Visa sa Pero vaiinkivano kaira kavoa osara ho kiva amiai vauvo Pero vaiinki namai amu vaiinkiva oho kio, Ke vakeqai vo uva iike uo. Haau ke vi ucaa ai kiva amiakaara vaimanka sa ai kiva amunaave. ¹⁰ Haau ai arara ikovaa are kivaka, vo vaiinkivano ai mpereti nunke vau vaiinkinavaka, kikanta karavusa kimikomanka kekanta karavusa naavuqi variavaunaave. Ai naavuqaa maintaraa raqisi vaia vaiinkinavusaqaa raqisi vai vaiinkia naavuqi are kikanta karavusa kimikomanka ¹¹ kekanta viaqi vaiha vohaa enta entaqi vaikeha kaira kavaavaunaave. Ke vo kaira kavaavauo vo vaiinkivano vo kaira kavo.

¹² Kekanta kaira kave sa via osara iiai variavauo Hiparu vakanaa vaiinkivanovaka karavusa naavuqi vauave. Vi vaiinkiva haau ai naavuqaa maintaraa raqisi vaia vaiinkisaqaa raqisi vai vaiinkia saiqa varoave. Vi vaiinkiva Hiparu

vakanaa vaiinkivano kikanta hampaka karavusa naavuqi vaumanka kekanta kenkakanta kaira kavaavaunaa vi vaiinkia kiva amiavauo viva ki kaira osara kinka sankunka kiva kimio vo vaiinki kaira osara viavaka nai sankunka seo kiva amuave. ¹³ Ho viva kikanta kiva kimuntema sea are kiriara qaiqaa ki saiqa varaane kivasea, vo vaiinki via arusea sakaiqaa arukonaave, kio.

¹⁴ Pero vaiinki namai amu vaiinkiva minki kuvo Pero vaiinkivano Iosepea aarama sovo vovano santeo karavusa naavuqinkaio via vika varovo Iosepeva osau nuquseo vo ukavaaqa ankaumaseo ou Pero vaiinki aaqanko vaua.

¹⁵ Iosepeva ou Pero vaiinki aaqanko vauvo Pero vaiinkivano viaa kihao, Ke kaira kave via osaraa vo vaiinki vo vaiinki iraua viṣa sa ki kaira osara ho kiva kimiavo. Vovano ariara kaira osara ho nai kiva nimi vaivave kimanka iunaave. Vi uvava quqaae vaio ivo, sae quqaa vaio ivo? kio.

¹⁶ Pero vaiinkivano minki kuvo Iosepeva aqao kio, Ke qaqi vaiinkivano vaiha sa ho ai kiva amiaave. Kotiva ki saihaqiae ke homa via osara ai Pero vaiinki kiva amiaave, kio.

¹⁷ Minki kuvo Pero vaiinkivano Iosepeaa kihao, Ke kaira kavauo ki maraquavano Nairi Namai hini vantaraini himpikeo vaihao kavaimanka ¹⁸ namaiqinkai vurimakaua soqe 7 navu visa vaaka soqema seo nouqosa qovaama vi, vaainte ou namai auhianta vaiha usau ne variaave.

¹⁹ Visa mini usau ne variamanka visa naankiara vo vurimakaua 7 navu namaiqinkai qovaamavi, visa sa soqe vaaka vakausa vaiha vuhaaiqi variasa variaave. Ke haau Isipini vahavaka via voqama vehi vurimakaua sa

kavaavaunaave. ²⁰ Vuhaaiqi varia vurimakauasa 7 navu namaiqinkai vaainte ou haau hoqare namaiqinkai vaainte usau ne vaia vurimakauasa aruse nama kaiqa saarave.

²¹ Visa vo vurimakauanavu aru nama kaiqa saavo visa vaakavano haau vauntema seoqai, vuhaaiqi vaiave. Sa visa vaakavano vaaka vau-manka mantaqumavio vaimanka variaave. Ke mintimase kaira kave vaikaunaihai qaqi himpi uo.

²² Ke qaqi himpi viaqaankai qaiqaa vaikavi kaira vo kave uo. Ke kaira vo kavauo *sankuma* voqaama vaivo via veba vohaiqaankaio noa soqe 7 navu irakaiave.

²³ Minkima irakeo via naankiara noa 7 navu vonavuvaka irakaiave. Irakaivo uvaivano iha voqaama ukihao via kakoqa aqu saivo via naankiara noa 7 navu irakaiva sa soqema vaiave.

²⁴ Viaqaankaio noa 7 navu sa soqeva ou noa 7 navu soqea nampiqama saiave. Ke kaira minkimase kave viaqaankai vi ucaa vaana saiqa vare varia vaiinkisa kiva nimuamankavaka, visa sa vi ucaa osara ho kinka kiva kimiavo, kio.

²⁵ Minki kuvo Iosepeva Pero vaiinkiaa kihao, Are kaira kaaraqanta kavaanaa, vikanta osara vaieva vohaa osaraqaima vaio ivo. Kotiva nai naankiara varae i osaraa kairasaama ai umiqeo ivo.

²⁶ Kotiva vi uvaaqaa ntuva seo minkima kivo: Are vurimakaua soqe 7 navu kavaanaa, via osara vaieva ihi soqe 7 navuma naankiara varianarove. *Sankuma* voqaama noa soqea 7 navu irakaia, via osaravaka vaieva ihi soqe 7 navuma naankiara varianarove.

²⁷ Vo vurimakaua 7 navu naankiara qovaama vuasa vuhaaiqi variasa, visa osara vaieva, ihi sa soqe 7 navuma naankiara varianarove.

Sankuma voqaama sa soqe irakaia 7 navu vaivo uvaivano iha voqaama ukihao kakoqa saia, via osaravaka vaieva ihi sa soqe 7 navuma naankiara varianarove.

²⁸ Kotiva naankiara nai saiqa varae i osaraa kairasaama ai umiqeo ivo kunaave. ²⁹ Vi kairaqaan Kotiva ntuva seo minkima kivo: Maa entaaqaankaio maini Isipini ntaravano 7 ihi vaaqio vihao soqema seo qampiqaqio vuanarove. ³⁰ Ntaravano soqema seo qampiqaqio viao 7 ihi soqea kaiqaiao viaqaankaio 7 ihi vaaqio vihao ntaravano sa ho qampiqaanarove.

³¹ Vi entaa sa soqe enta vaimankaa ki, vaiinki nahenki airi ntara variaina entaa kauru sevaave. Are kaira kavaana osarava minkimama vaio ivo: ³² Kotiva uva kiva keo vaasama vi entaa vi uvaa qovaama saeva auki vaivaa kia, are kaira kaaraqanta vohaa vasa kavaarao, kio.

³³ Iosepeva minki kivaseo qaiqaa Pero vaiinkiaa kihao, Viaa iihaama vaiinki vo, avu aako vakaa vaiinki ranta sea via noaiqama saiao viva Isipini vaihao aiqava saiqaqaa raqisiaie.

³⁴ Vi vaiinkia noaiqama sea vaiinki vonavuvaka noaiqama saiama vinavusa vaiha aiqava ntara qantu vare aniraqaankai hini ntara takisi var-entemase vaevaave.

³⁵ Vinavusa ntara vaehama qaqi vaiinki nahenkiaa nenka 4 navu ukuke vohaiqa kinavu kimiake kivaqi vivaave. Vinavusa ai Pero vaiinki auku ntehama takisi var-entemase, ntara vareha 7 ihi ntara soqema seo qampiqainaa vi

ntaraa vaaqi viha vuu vo vakusa vo vakusaqi noa naavuqi vuu qaqi vakaivo ³⁶ naankiara 7 ihi sa ntara qampiqaina ihiva ani ntaiiao ntara ho vari-
aie. Vinavusa minkima saivo naankiara sa ntara variaina entava ani ntaimanka maa vakanaasa antuqa aruaia entava anintaimanka sa ntaraa qukuaiaki, qaqi vaivaave, kio.

³⁷ Iosepeva minki kuvo Pero vaiinkivanovaka, via noa vaiinki vonavuvaka, Iosepea uvaa soqe uvave kivase, vaiinki vo noaiqama seaa iiha ³⁸ Pero vaiinkivano kihao, Nankima vaina vai-
inkiae noaiqama saraave? Kotiva Iosepea avu aakoqaa soqema seo raqisi vaivoa kio, viva vi uvaa osara kinavu kiva kimivo. Sa vovano Iose-
pea aakara saaiava vaio ivo, kio.

³⁹ Minki kivaseo Pero vaiinkivano Iosepeaa ki-
hao, Kotiva vi uvaa osara ai kiva amivo ai avu aakovano ho vaivaa varianaraa kio, vovano ai aakara saaiava sama vaio ivo. ⁴⁰ Vaa iiham-
ke ai noaiqama saaiaa arema ki noa naavuqaa raqisi vaiama aiqava ki vaiinki nahenki ai uva iiqi vuake. Keqaima Pero vaiinkivano vaiha ai noa vaiinkima vaiaave, kio.

Iosepeva noaiqama vio aiqava Isipiqaa raqisua
⁴¹ Pero vaiinkivano minki kivaseo qaiqaa Iose-
peaa kihao, Vake ke ai noaiqama saaiaa are aiqava Isipiqaa raqisiqia vuane, kio.

⁴² Minki kivaseo qaqi vaiinki nahenki Iosepeva noaiqama vuainaa iriake kio, Pero vaiinkivano nai vuqaqi nonkuko ringia rahunku seo Iosepea vuqaqi nonku amikeo, soqe ukavaaqaa nonku amikeo, kora oi *hankaroro* via auntaqi ruvu amikeo, ⁴³ qosavaka qosaqaa santarumako

kaariavaka Iosepea amuvo Iosepeva Pero vaiinki naankiaraini noa vaiinkivano vaihao iqosa kaariqi vauvo qosavano via rarauqi vi vaumanka vaiinki vonavu Iosepea avuni santamaqi ou viha kiha, Iosepeva ani vaio ivo. Ne vinivo viva aniae, ki vaua. Minkima seo Pero vaiinkivano Iosepea noaiqama sovo Iosepeva aiqava Isipiqaa raqisi vaua.

⁴⁴ Pero vaiinkivano Iosepeaa kihao, Ke Pero vaiinkivano ai noaiqama se uo. Are sa hove kiea, maa vakanaasa sa ho nái iise saiqa varevaave, kio.

⁴⁵ Minki kivaseo Pero vaiinkivano Iosepea qaraasa auku ntava amikeo viaa *Sapenaati-Paneaave* kivaseo nahenki vo via auku Asenaatia via amua. Vi nahenkiva Potipea raavuavano vauvo Potipeva Isipi vaiinki nahenkiaa iihao suaiaa kinavu vaiqave kihao via aarehao vau vaiinkiva vakusa vo Oniqi vaua. Iosepeva Potipea raavua Asenaatia vaakeo vaihao aiqava Isipini vi anihao saiqaqaa raqisihao vaua.

⁴⁶ Iosepeva noaiqama vio viva 30 ihi vaasova vaihao Pero vaiinki saiqa hoqarama keo vaaqio vua. Iosepeva Pero vaiinkivano vaua mini seo Isipini vi anihao saiqaqaa raqisi vauvo ⁴⁷ ihi 7 navu vaaqio vihao ntaravano soqema seo qampiqaqio vuvo ⁴⁸ Iosepeva vi entaa vi ntaraa vareo vo vakusa vo vakusaqi vuu vakoa. Vo vakusa vo vakusavano vauvo Iosepeva vakusa kakaaqa qampiqo ntaraa vi ntaraa qantuseo nai vi vakusaaqi vuu vakeo, vo vakusaqi qampiqo ntaraa qantuseo nai vi vakusaaqi vakeo, minkimaqio vihao vo vakusa vo vakusaqi ntara qantu sehao vuu vakoa.

⁴⁹ Iosepeva nuqavano airi vaintema seo, viva airi ntara qantu vareo vo naavu vo naavuqi mpiqaseo vakovo airi ntara vauvoa kio, Iosepeva hini ntaraqai mpukaqi qara ntuva keo hini ntara sa mpukaqi qara ntuva karaio, qaqi naavuqi vuu vakoa.

⁵⁰ Sa ntara qampiqo entava sa ani ntovo soqe ntara qampiqo entava qaqi vau entaa Asenaatativa Potipea raavuavano vainki kaaraqanta Iosepea vaka amikovo ⁵¹ Iosepeva nai vainki hoqare vakakoa auku ntehao *Manaseave — Kaurusaunaave*, kio. Iosepeva kihao, Kotiva ki saihaqimanka kinka vasausavaanavu ki mantaiqama kimikoa kauruse, kenka karavusa naavuqi vusai enta variavaunaavaka kauru se uo, kio.

⁵² Minki kivaseo Iosepeva nai vainki via naankiara vakakoa auku ntehao *Efaraimuave — Vainki Kimiave*, kio. Iosepeva kihao, Ke maa vakaini variavauo ki vaaka maara ntomanka variavauo Kotiva ki sahaqivo kinka vaakaiqimanka vauo Kotiva vainki ki kimivo, kua.

⁵³ Ho Isipini soqe ntaravano qampiqaqio vuvo 7 ihi kaiqovo ⁵⁴ Iosepeva kuntema seo, sa ntara qampiqo ihiva 7 navu anieva hoqarama koa. Vi entava ani ntovo vo vakaini vo vakaini sa ntara vauvo Isipiniqaima ntara qantu vuu naavuqi vakova ho vaua.

⁵⁵ Sa ntara qampiqo entava anintomanka Isipi vakanaasa ntaraa antuqa ntaihomanka vaiha Pero vaiinkiaa ntara kinavu kimiane kuvo Pero vaiinkivano visaa kihao, Ne Iosepeva vainaini ou vima, viva kiaina uvaa iriake, kua.

⁵⁶ Isipini voqi voqi ntara sa vauvo Iosepeva vo naavuqi vo naavuqi ntara qantu vuu vakoa ou qenti qankuaseo munima vaehao ntara vi vakanaasa nimua. Aiqava Isipini ntara sa qampiqovoa kio, Iosepeva minkua. ⁵⁷ Vo vakaini vo vakainivaka sa ntara vaumanka vo vakanaasa vo vakanaasa Isipini Iosepeva vaunaini ntara varaesa vuama.

42

Iosepea vasausavaanavu ntara varaesa Isipini vuama

¹ Kanaha vakainivaka ntara sa vauvo Iakovova vaihao iuwo Isipini ntara vauvo viva nai maaqunavuaa kihao, Ne qumina maini vaiha nai kave nai kave iha vaivoave. ² Isipini ntara vaio ivo kiamanka iunaave. Nenavu mini oku ntema munima aqusehama ntara vara vii kinavu kimiqe kenavu ntara via nehama sa quku viai, qaqi vaiqi vuae, kio.

³ Iakovova minki kivaseo Iosepea vasausavaa 10 navu nikikomanka visa munima aquseha ntara varaesa Isipini vua. ⁴ Visa vie uvo Iakovova sa Benaminia Iosepea qaka akisaraio kihao, Viavaka akikaaiao vo ahasavano via mantaiqama amikaanto, kua.

⁵ Kanaha vakaini noaiqamaseo ntaraa antuqa aru entava ani ntomankaa ki, vo vaiintinavuvaka Iakovoave Isaraiae via maaqunavuvaka ntara varaesa Isipini vua.

⁶ Vuvo Iosepeva aiqava Isipiqa raqisi vauva vaihao vo vakaihainaasa vo vakaihainaasa visa munima vaehao ntara nimi vaumanka Iosepea vasausavaanavuvaka Iosepeva vaunaini ou

nte via avuqaa vaiha hiqintivi kankakaavuvi visa nái vii vakaini se vauvo ⁷ Iosepeva nai vasausavaanavu vii uqauama seo kaveo, viva sa visa vii uqauamaseo kavovaa voqaama vaihao Iosepeva visa anoqama seo ireo kihao, Ne kaihai aniasae iavo? kio.

Minki kumanka visa kiha, Kenavu Kanaha vakaihai ntara varaea anuausave, kinka.

⁸ Visa minki kiha visa sa Iosepea vii uqauqamase kavovo Iosepevaqai nai vasausavaanavu vii uqauama seo kavoa. ⁹ Visa sa Iosepea vii uqauqamase kavarai, kankakaavuvi vauvo Iosepeva nai haau kaira kavoa viaa qaqi iikeo visaa kihao, Aqao, nenavu vo ahaska ampeqiesa aniaivo. Nenavu maini ani kinavu ampeqamase kaveha kenavu sa soqemase raquainaa kavaesa aniasave, kio.

¹⁰ Iosepeva minki kumanka visa kiha, Noa vaiinkio, kenavu sa minkiea anuausave. Kenavu ai saiqa vaiinkinavu vaiha munima aquseha ai ntara varaea anuausave. ¹¹ Kenavu vaiea qaka vasausa vauo kinavu qova vaiinki vohaiqvano vaio ivo. Sa kenavu maa vakanaasa ampeqiea anuausaauve. Kenavu quqaa uvaqai kua vaiinkisama aninte uo, kinka.

¹² Visa minki kuvo Iosepeva kihao, Nenavu unahaama kiavo. Nenavu maini ani kinavu ampeqamase kaveha kenavu sa soqemase raquainaa kavaesa aniasave, kio.

¹³ Iosepeva minki kumanka visa kiha, Kenavu haau vaiea qaka vasausa ¹² navu vauo kinavu qova vohaa vaiinkivano Kanaha vakainima vaio ivo. Kinavu qaka vovano quku vuvo kinavu qaka

naankiaraihainaava kinavu qoavakamaseo vaio ivo, kinka.

¹⁴ Visa minki kuvo Iosepeva aqao kio, Ke vaasa kunaa, ne maa vakanaasa ampeqiesama aniaovo.

¹⁵ Maankimase ke ni uva avakeha kavaeave. Ke kenka sauqu ainqiqaa aquseha Pero vaiinki auku ntehama minkima ki: Ninavu qakavanovaka sa maini aniea, nenavu sa maihai ho vivaave.

¹⁶ Ninavuqinkaio vohaiqavano ou ni qaka vika vareo maini aniae. Viva via vikareva viaqe ke ni hini usa karavusaqima kaaia nenavu maini vaiqe ke ni uvaa quqaave unave kiae. Ke kavaaio ni uva una uva vaiea, ke niara maa vakanaasa ampeqiesa aniasave kiaave, kio. ¹⁷ Iosepeva minki kivaseo kaaramo enta visa karavusa naavuqi somanka vaua.

¹⁸ Visa karavusa naavuqi mini vauvo kaaramo enta aikarovo Iosepeva anintero visa kiva nimio kihao, Ho ke Kotia uva ii vaua vaiinkisama vai uo. Ke vo uva kiai ne vi uvaa ho iivea, ke ni vehasuma nimikararave.

¹⁹ Ne quqaa uva ki vai vaiinkisa vaivea, niqinkaio vovano maaqi karavusa naavuqi vaiama ne hini usa anirante ntara vare vuu nenka navunaasa sa ntara vakesa nimi, ²⁰ viaqaankai nenka qaka vika vare ke iainanaini munku saiqe kavaae. Ke via kave, niara quqaa uva ki vaiasave kihama ni vehasuma nimikararave, kio. Iosepeva minki kumanka visa eo kenavu minkieave kinka.

²¹⁻²³ Iosepeva Isipi vakanaa uvaqinkaio ki vauvo vovano via uva uantaseo via vasausavaanavu kiva nimumankaa ki, visa Iosepeaa vo vakanaava vaihao sa kinavu uva ho iivo kivase, visa nái uvaqinkai nai kiva

ami nai kiva ami iha kiha, Oho, haau kenavu kenkanavu qaka vo mantaiqama amikaavaunaa via saara Kotiva vake kinavu noa maara kimivo. Haau kinavu qakavano iq'i rakehao kinavuaa sa minkiake kumanka kenavu sa via uva iiai, sa via aaquhikama amikaavaunaave. Via saara vake noa maaravano kinavuqi qovaama vio ivo, kinka.

Visa hini usa minki kuvo Rubeniva kihao, Oho, vi entaa ke niara kiha, Sa via mantaiqama amikaake, kiavau ne ki uva iiakaa vaumanka sa ki uva iuave. Ne minkimase via arusoa saarama vake kinavuqaa noa uva vaio ivo, kio. Minki kumanka visa Iosepeva sa kinavu uva ho iianarove kivaseha nai kiya ami nai kiva ami i vauvo Iosepeva vaihao visa aiqava uva kua ho iua.

²⁴ Iosepeva visa uva iuvo via munkusavano mantaiquo viva visa vauaqaankaio uantavio nai vii qaqlini vakeo evaara iq'i rakaseo qaiqaa via auntavano ho uva kiaiava vauvo viva uanta vio sauqu aave vakehao nai saiqa vaiinkinavuaa kihao, Vi vaiinkiaqi karavusaqi saake, kumanka visa Simioniva nai qaka vasausavaa hampaka vau vaiinkia, visa via rumpa vare vuu karavusa naavuqi soa.

²⁵ Via rumpa vare karavusa naavuqi vuu sovo Iosepeva nai saiqa vaiinki evaara kiva nimio kihao, Ne ntara vare visa uka mpiqa sehama visa silvaa munima nái nimihama visa ukaqi ntuva nimikaake. Aaraini viha vika ntara neavaka ntuva nimikaake, kio. Minki kumanka via saiqa vaiinkinavu Iosepeva kuntemase, ntara ntuva nimikoa.

Iosepea vasausavaanavu nái maaqaini anirante vua

26 Iosepea vasausavaanavu ntara ntuvako ukaa vaa vaai nái donki auvaqaqaa rumpase vakusa mini se nái maaqaini viesa vuama. **27** Visa aaraini vuvo entama vumanka saiqe mini qaqi ntaka vaikaae kivase mini vauvo vovano nai ukaqinkaio ntara equseo saiqe kenka donki amiae kivaseo kavovo nai ntaraa aquso munimava ukaqi qaqi vaua. **28** Viaqi vauvo viva nai qaka vasausa naarama seo kihao, Maa kavaake. Ke *silvaa* munima mini ntaraa aqu sauava ukaqi qaqi vaio ivo, kio. Minki kumanka visa voqamase naaku ikomanka qekeha aiqu sauqu nti nti iha kiha, Oho, Kotiva kinavuaa nankihaoe minkivo? kinka.

29 Visa minki kivase ou vi Kanaha vakaini nái qova vaunaini ou nte visa nái nu vasaassaa Iakovoa kiva ami kiha, **30** Isipiqa raqisi vaiinkiva kinavuaa kamoqara kihao, Ne Isipi vakanaasa ampeqiesa aniasave, kivo. **31** Viva minki kimanka kenavu kiha, Aqao, sa kenavu Isipi vakanaasa ampeqiea aniausaauve. Kenavu quqaa uvaqai kua vaiinkisama ani uo. **32** Kenavu qaka vasausa 12 navu vauo kinavu qova vohaa vaiinkivanoqai vaio ivo. Kinavu qaka vovano quku vuave. Kinavu qaka vo naankiaraihainaava qaqi vaihao kinavu qosantio Kanaha vakainima vaio ivo, kuo **33** vi vaiinkiva kihao, Ne quqaa uva ki vai vaiinkisa vaivea, niqinkaio vovano karavusa naavuqi vaiama ne hini usa anirante ntara vare vuu nenka navunaasa sa ntara vakesa nimi, **34** viaqaankai nenka qaka vika vare ke iainanaini via vii saiqe ke via kavaae. Ke via kave niara quqaa uva kia vaiinkisave kihama niara sa maa vakanaasa

ampeqiesa aniasave kiaave. Minki kivasema ke ni qaka vasaara vo karavusa naavuqi saainaa ninka nimiaima ne ho maini vaiha munima aquseha ntara varevaave, kiave. Mini Isipiqaarraqisi vai vaiinkiva kinavuaa minkima kiave, kinka.

³⁵ Minki kivase visa nái ntara ntuvako ukaa ontontiaqama seha kavovo visa ntaraa aquso *silvaa* munimava vo uka vo ukaqi qaqi vaumanka visavaka visa qovavaka voqamase qekeha vuvo ³⁶ visa qova Iakovova kihao, Oho, ne aiqava ki vainkivaanavu kaiqa saesa auki variavo. Umpo, Iosepeva quku vuave. Simioniva sama vaio ivo. Ne Benaminiaavaka mini vika vuu saesa auki variavo. Oho, vo ahasa vo ahasa maara ntai ahasava kiqima vaio ivo, kio.

³⁷ Minki kuvo Rubeniva nai qoaa kihao, Benaminia ki kimiaqe kire viaqaa raqisigi vima qaiqaa nina vika vii amiae. Ke sa ourante nina vika vii amiae, are homa ki maaqukanta aru senaave, kio.

³⁸ Minki kuvo Iakovova aqao kio, Sa ke kenka maaqu naankiaraama ai amiaiama vike vinaave. Via vasaava quku vuvo vivaqaima qaqi vaio ivo. Ne via vika vare vivo vo ahasavano via mantaiqama amikaiaqe ke erera sauhi vakausa munkusa mantaiqiaqe quku viaave. Sa ne ho via vike vivaave, kio.

43

Visa Isipini qaiqaa anirante vuama

¹ Iakovova sa ho via vike vivaave kuyo sa ntara vau entava qaqi vaiqio vumanka ² visa Isipi vakaihai vare anu ntaraa nama kaiqa sovo visa

qova visaa kihao, Ne anirante ou qaiqaa munima aquseha ampara ntara voqavaka vare aniake, kio.

³ Minki kuvo Iutiva aqao kio, Kenavu ai kiva amunaave. Isipiqaqaa raqisi vaiinkiva kinavu kiki-hao minkima kivo, Ne sa nenka qaka vo vike aniqe ke via kavaaea, ne sa ho ke iainanaini qaiqaa ani ntara vaevaave, kiave. ⁴ Are Benaminiavaka kinavu hampaka akikaiae kenavu via vakamase Isipini ntara varaea vuae. ⁵ Noa vaiinkivano minkima kivo: Ni qaka vovano sa ni hampaka kuviea, ne sa ke iainanaini ho anivaave kia, via saara are sa viavaka akikaiea, kenavuvaka sa ho mini viaave, kio.

⁶ Minki kuvo Iakovova via vo auku Isiraiva kihao, Ne vi vaiinkia nenka qakaa sa kiva amiakaara vaimanka ne nenka qakaa via kiva ami-aave. Ne viaa via kiva amiaraa kio, via saara kiqima noa maara ntai ahasava vaio ivo, kio.

⁷ Minki kumanka visa kiha, Aqao, vi vaiinkiva vo uva vo uvaa kinavuvaka ki navunaasavaka iraiave. Viva kihao, Ni qova qaqqie vaio ivo? Ni qaka vovano vaiove? kiave. Minki kivea, kenavu vi uvaa vi uvaa nai kiva amunaave. Kenavu nai kiva amiha sa kenavu viva nenka qaka maini vike kuvuake kireva i uvaa iiai, qaqqi uva ki vauo viva nai vi uvaa kiave, kinka.

⁸ Visa minki kuvo visaqinkaio Iutiva nai qoa Isaraiaa kihao, Are vi vainkia ki vakamasea akikaiae kenavu vaasa vuae. Kenavu sa vaasa vuaea, kinavu vainkivaavaka aevaka quku vivo.

⁹ Kevano vi vainkiaqaa raqisiqi vieave. Vi vainkiva mantaiqama viea, are kiqaaqai vi uvaa vakenaave. Ke via vika vare ou ni ourante sa vii nina qaiqaa amiaeae, via saara kiqaa uva vaiaqe

ke aiqava enta qaqi vaiqi viha vi ucaa vararaave.
10 Kenavu ntaraa vaasa vuakaarave. Kenavu vaasa vuae ki, homa kaara naini ou vi ourante anuntauaikiio, kio.

11 Iutiva minki kuvo via uvavano mpeqaiquvo visa qova Isiraiva kihao, Ne mini quqaa viesa ivera, ne maihai soqe aiaia vare vi vaiinkia vuu qaqi amivo viva niara quahehaoma vari-
 aie. Vaakaqaa aqua vahaveaave, saaqa voqaa namaive, ntaraqaa aakaave, saivu voqaamave, vi
 ahasee vi ahasee vuu qaqi amiake. **12** Nenta ukaqi kavaavo munima vaia, vi *silvaa* munimaavaka nai amiha qaiqaa voqavaka amiake. Vovano qumimaqa ihaoe ni ukaqi vi munimaa qaqi ntuva kaiave? Ne viaavaka ireha kavaake. **13** Nenta qakavaka vika vare vaasa vuake. **14** Ne vi vai-
 inkia avuqaa ou vaivo Kotiva ni naaquhikama nimikaiao vi vaiinkiva ni qaka vasaara vovaka Benaminiavaka qaqi saiama ne vikanta ho ntika vare ourante aniake. Oho, ki vainki kaiqavi sa
 vaivea, kentaraama vaiaave, kio.

15 Minki kumanka visa aiaia vare, *silvaa* munima kaara naini vare, Benaminiavaka vika vare vua. Visa sante Isipini orunte Iosepeva vau-
 naini vuvo **16** Iosepeva Benaminia kaveo nai naavuqaa raqisu saiqa vaiinkiaa kihao, Are maa
 vaiinkinavusa ntika varea ki naavuqi vuu sea vurimakaua arusea nunka kaimanka vi vaiinkinavusa isaraqaa kivaka ntara naake, kio.

17 Minki kuvo via saiqa vaiinkivano Iosepeva kuntema seo, via vasausavaanavu Iosepea naavuqi ntika vuu soa.

18 Minkima seo ntika vuu somanka visa Iosepea naavuqi vuu soa saara naaku ikomanka kihia,

Haau kinavu ukaqi ntuvako munimaa saarae viva kinavu maaqi vuu seo ivo? Viva kinavu ravaaqaau seo rumpaseo, kinavu donkivaka vareo, kinavuaa ne karavusa vaiha ki saiqaqai qumina varaake kianarove, kinka.

¹⁹ Visa minki kivase ou naavu qentiana vaiha Iosepea saiqa vaiinkiaa kiha, ²⁰ Noa vaiinkio, haau hoqare kenavu ntara vaaea anuausa maihai ani vare kenkanavu maaqaini anirante ²¹ aaraini vuavauo entama vumanka aarana vaikaea iha kavaavauo kenavu ntaraa aqu saavauna munimaa kinavu ukaqi qaqi ntuva kova vauave. Vovano kinavuaa muara varaavo kianto ki, kenavu qaiqaa qaqi vi munimaa vare anuro ²² Kenavu vo *silvaa* munimavakä ntara vaaea vare ani uo. Nai kavave munima kinavu ukaqi ntuva koave? kinka.

²³ Visa minki kuvo Iosepea saiqa vaiinkivano kihao, Hove, sa qekaake. Ninavu vaiqavanovaka ninavu qoa vaiqavanovaka Kotiva, vivama vi munimaa ninavu ukaqi ntuva koave. Kema haau vi entaa ni munima varaavaunaave, kio. Minki kivaseo viva ou Simionia karavusa naavuqinkaio suvantu seo vika vareo visa vaunaini vii soa.

²⁴ Simionia visa vaunaini vii seo Iosepea saiqa vaiinkivano visa ntika vuu Iosepea naavuqi seo visa nái aiqu mintuqaake kio, namai saqa nimio, visa donkivaka ntara nea nimio, ²⁵ visaa kihao, Ne isaraqaa Iosepea vakamase ntara nevaave, kumankaa ki, visa Iosepea amiesa vare anu ahasaahenuqamase vakoa.

²⁶ Henuqama vake vahaaqaini vauvo Iosepeva mihaio anio nai naavuqi oiqekeo vumanka via qaka vasausavaanavu visa nái vare anu ahasaahenuqamase vakoa.

vare, naavuqi oiqeke Iosepea amiha vakaini hiqintivi kankankaavi vaiha visa nái vii vakaini seha vaua. ²⁷ Mintimase Iosepea avuqaa vauvo Iosepeva visa ireo, Nenavu vo? Nenavu hoe va-
iavo? kivaseo viva qaiqaa visa ireo kihao, Ho ni qova sontaiqama viave kiava vo? Viva qaqqie vaio ivo? kio.

²⁸ Minki kumanka visa kiha, Ai saiqa vai-
inkivano kinavu qova, viva qaqqi vaihao homa
vaio ivo, kivase visa qaiqaa kankankaavi nái vii
vakaini seha vaua.

²⁹ Visa minkima Iosepea avuqaa vauvo Iosepeva visa aikukumaqio vihao nai noa via
vainki, Benaminia kaveo visa ireo kihao, Ne
nenka qaka naankiaraaave kiava, maa vivae
vaio ivo? kivaseo Iosepeva Benaminiaa kihao, Ki
maaquo, Kotiva ai soqema amikaiae ki uo, kivaseo
³⁰ nai qaka vii qaiqaa kavoaa kio, Iosepeva iqi
rakaaiava aumanko vauvo viva viaqinkaio santeo
ou vo rumuqi nariaraa vaihao nai qakaa iqi rakeo.
³¹ Nai qakaa iqi raka seo Iosepeva nai viiqinkaio
auquru nunka seo vuaqaa ukuseo, nai iqi rakoa
kaiqa seo, qaiqaa aniranteo nai qaka vasausa
vauaqi ou vaihao nai saiqa vaiinkinavuaa kihao,
Ho ntara raaquake, kio.

³² Minki kivaseo Iosepeva vo kaintaqaa nar-
iaraa oquvi vaumanka Iosepea saiqa vaiinkinavu
ntara raaquuse Iosepea amumanka Iosepea
qaka vasausavaanavu vo kaintaqaa oquvi vau-
manka ntara raaquuse nimumanka Isipi vaiinki
vonavu visa nariaraa vo kaintaqaa oquvi vau-
manka ntara raaquuse nimua. Isipi vakanaasa
kiha, Kenavu Hiparu vakanaa vaiinkinavu ham-

paka ntara naaoave, ki, visa nariaraa vo kaintaqaan ntara ne vaua.

³³ Iosepea qaka vasausavaanavu ntara naesa uvo Iosepeva visa rairaseo vi kaintaaqaa vi kaintaaqaa oquvi vaiha ntara naake kumanka visa oquvi vaiha kavovo avuniaraqaankaio visa vasaava nai qakantioqai nai qakantioqai oquivio vaua. Iosepeva minkima avuqavuqama seo visa raira somanka visa viaa voqamase aako kaa iha kiha, Nankimaseoe viva kinavu nova kinavu vakakai osaraa ho iivo? kinka.

³⁴ Visa minki kivase oquvi vaumanka Iosepea saiqa vaiinkinavu Iosepea kaintaqaankai ntara vare, visa nimiqi viha Benaminia amihama airi naini via ntara amua. Benaminia minkima amumanka visa aqava ntaravaka namaivaka ho noa.

44

Iosepeva qaiqaa visa avakehao kavoa

¹ Visa ntara novo viaqaankaio Iosepeva nai naavuqaa raqisu saiqa vaiinkia kiva amio kihao, Ntara varea visa ukaqi mpiqasea visa ntaraa aqusaa munimaavaka visa ukaqi nai qaqlima ntuvu nimikaane. ² Minkima sea ou ki *silvaa kapa soqea* varea visa qaka naankiaraama ukaqi via munima vakamasea ntuvu amikaane, kio. Minki kuvo viva Iosepeva kuntema seo, minkima nimikoa.

³ Minkima nimikovo via qararaa visa nikikomanka Iosepea qaka vasausavaanavu visa nái donki hampaka nái maaqa viesa vuama.

⁴ Visa nái maaqa viesa ou vi amparaiqaqai aaraini vuvo Iosepeva nai naavuqaa raqisu saiqa

vaiinkiaa kihao, Santea vi vaiinkinavusa vakaqia vuane. Visa vinaini ou ntea visaa minkima kiane, Ki noa vaiinkivano ni soqema nimikaimanka ne nankihae nai mantaiqama amikaavo? ⁵ Ne nankihae ki noa vaiinki kapa soqea muara varaavo? Viva vi kaparaqinkaio namai naiave. Viva vi kaparaqonkaio naankiara vo saiqa vo saiqvano qovaa iaina kavaaina kapava vaio ivo. Ne vi kaappa muara vareha manta saiqa varaavo, kiane. Are minkima visaa kiane, kio.

⁶ Iosepeva minki kivaseo via akikovo via saiqa vaiinkivano santeo visa ou ntkaseo vi uvaa kiva nimumanka ⁷ visa aqao ki, Nankihaae are kinavuaa minki kiarao? Kenavu sama via kapa muara vare ani uo. ⁸ Haau Kanaha vakaini kenavu *silvaa* munima kinavu ukaqinkai ranta saavaunaa, vi munimaa qaqi naima amunaave. Kenavu vi munimaa nai amuausaa ki, sama ai noa vaiinki naavuqinkai vo ahasavaka muara vararaave. ⁹ Are rantaqia vihaa kavaiao kinavuqinkaio vo vainki ukaqi vi kapava vaiea, homa vi vaiinkia aru sea kinavuvaka rumpa kaiqe kenavu ai noa vaiinki via saiqa vaiinkima vaiaave. Sa kenavu via kapa muara vare ani uo, kinka.

¹⁰ Visa minki kuvo Iosepea saiqa vaiinkivano kihao, Hove. Kaapa muara vareo aniaina vaiinkia, viaqaima ke rumpa saraave. Ne hini isa homa nenka maaqa qaqi vivaave, kio.

¹¹ Minki kumanka visa vaasa nái uka nái uka vakaini vaavi se, no rumpa koa vantuse vakovo ¹² Iosepea saiqa vaiinkivano visa vasaara ukaqinkaio naane ranta seo kavovo sa vauvo

rantaqio vihao visa qaka Benaminia esaanai-hainaara ukaqi ranta seo kavovo kapavano via ukaqi vaua.

¹³ Visa qaka ukaqi kapavano vaumanka visa kave, visa nái ukavaaqa naahaqu naahaqimase, voqamase qekeha visa nái ntara ntuvako ukanaavua vara vaai nái donkiqaa rumpase anirante Iosepea vakusaini qaiqaa vuama.

¹⁴ Visa Iosepea vakusaini anirante vuvo Iosepeva sa nai naavuqinkaio vevanteo viaio, qaqi viaqi vauvo Iutiva nai qaka vasausavaanavu hampaka Iosepea naavuqi oiqeke vaka ntaka hiqintivi vauvo ¹⁵ Iosepeva visaa kihao, Ne nana ahasee varaavo? Ne sae iriavo? Ke naankiara qovaa iaina ahasee kave vauausama vai uo, kio.

¹⁶ Iosepeva minki kuvo Iutiva kihao, Oho, kenavu nana uvae ho kiaave? Nana uvae kenavu kiaiaa are vi uvaa quqaave kihaa sa muara varaavo kiane? Sa kenavu minki kiaima uvava vaio ivo. Kenavu vaaqu saiqa varauaraa kio, Kotiva kinavu qoa saiqa qoquaama seo ivo. Ho kenavu maa entaaqaankai rumpakesa voquaama vaiha ai saiqa vaiinkiqaima vaiaave. Via ukaqi kapa ranta sai vaiinkivavaka, kenavu via vasausavaanavuvaka, ai saiqa vaiinkiqaima vaiaave, kio.

¹⁷ Iutiva minki kuvo Iosepeva aqao kio, Sa ke ni aiqava rumpa karaave. Via ukaqi ki kapa ranta saina vaiinkiva, vivaqai maini vaihao ki saiqa vaiinkima varianarove. Ne hini asa homa nenka qova vainanaini qaqi vivaave, kio.

¹⁸ Iosepeva minki kuvo Iutiva Iosepea aumanko ou nteo viaa kihao, Umpo, noa vaiinkio, saiqa ke uva vo ai kiva amiae. Ke minki kiaiaa are

noa vaiinki Pero vaiinki voqaama vaihaama sa ki kikiane. ¹⁹ Are haau kinavuaa kihaa, Ninavu qova qaqie vaio ivo ninavu qaka vovano vaio ivo kiaa ²⁰ kenavu kiha, Kinavu qova sontavano qaqima vaio ivo. Kinavu qova sontaiqama viva vaihao vainki vo vakakaivo qaqima nai qosantio vaio ivo. Vi vainkiva qaqi vaivo via vasaava quku vuvo vivaqai nai noa Raikea via maaquvano qaqi vaivoa kio, via qova voqama seo viaa antuqa aivo vaio ivo, kunaave.

²¹ Kenavu vi ucaa ai kiva amuaa are kihaa, Vi vainkia vika vare aniqe kevaka via kavaae, kiaama ²² kenavu ariara kiha, Noa vaiinkio, vi vainkiva sa ho nai qoa mini seo anianarove. Viva nai qoa mini seo aniea, via saara via qova quku vuanarove, kunaave. ²³ Kenavu minki kuua are kinavuaa kihaa, Ne sa nenka qaka vika vare anivea, ne sa ho ke iainanaini kuvu ntara varevaave, kianaave. ²⁴ Are minki kiaama kenavu qaiqaa kinavu qova vainaini vi ou nte are kiana ucaa via kiva amunaave. ²⁵ Via kiva amuo kinavu qova kihao, Anirante qaiqaa ou ntara varaaake kimanka ²⁶ kenavu viaa aqao ki, Sa kenavu kenkanavu qaka vika vare vuaeaa, kenavu sa ho vi vaiinkiva vainanaini ho viaave. Kinavu qakavanovaka sa viea, kenavuvaka sa vieave, kunaave.

²⁷ Kenavu minki kuo kinavu qova kinavuaa kihao, Ne iiaave. Ki naaka vovano qorainki vainki kaaraqanta vaka kimikeo ivo. ²⁸ Vovano kquaankaio vio sa qaiqaa ouranteo anumanka ke viaa oho, qaasau vairivano via aruseo ruqeqaama seo ivo kivaseha sa via vii qaiqaavaka kavau-naave. ²⁹ Ne maa vainkiavaka vika vare vivo vo

ahasavano via mantaiqama amikaiea, via saara ke erera sauhi vakausa ki munkusa mantaiqiaqe ke quku viaave, kiave.

³⁰⁻³¹ Kinavu qova minki kiaa ki, kenavu sa via maaqu naankiaraama vika vare qaiqaa anirante vuaea, kinavu qova kavaiao via maaqu naankiaraava sa kinavu hampaka vaiao viva vaasama quku vuanarove. Via maaqu naankiaraava qaqi vaivoa kio, kinavu qova qaqi vaio ivo. Via maaquvano quku viao via qovavaka sa qaqi varianarove, qukuma vuanarove. Kenavu sa vi vainkia vika vare vuaea, via saara kinavu qoa munkusavano mantaiqiao quku vuanarove. ³² Ke kenka qoaa minkima kunaave, Kema viaqaa raqisiqi vuaiao viva homa varianarove. Ke ourante sa viavaka vika vare aniaeae, kiqaama aiqava enta vi uvava varianarove, kunaave. Ke kenka qoaa minkima kunaave. ³³ Noa vaiinkio, viaa iihaama kiqaima rumpa kaiaqe ke kenka qaka vakusa vare, maini vaiha ai saiqa vaiinki variaiao ki qaka viva nai vasausavaanavu hampaka qaqi vuiae. ³⁴ Ke sa via vika vare vuaea, nankimase ke kenka qova vainanaini ho viaave? Sa ho viaave. Umpo, sa ki kikikaiaqe kenka qova vainanaini ou vaiha via munkusavano nai maaqu saara mantaiqinaa kavaae, kio. Iutiva minki kua.

45

Iosepeva nai qaka vasausa nai osara qoqaa kiva nimua

¹ Iutiva minki kuvo Iosepea munkusavano voqama seo mantaiquo vahao iuvo nai saiqa vaiinkinavu nivuqaa iqi rakaaiava aumanko vauvo

viva aiqava nai saiqa vaiinkinavuaa kihao, Ne aiqava maaqinkai ki maini se vuake, kumanka visa vuvo sa vovanovaka vauvo Iosepeva nai qaka vasausa hampaka vaihao nai osaraa visa kiva nimua. ² Iosepeva kiva nimio voqama seo rake-hao vaumantaa ki, Isipi vakanaasa voqi vausa viva iqi rake vaua iumanka aiqava Pero vaiinki naavuqi saiqa vare vausavaka Iosepeva iqi rakoa iua.

³ Iosepeva nai qaka vasausaa kihao, Ke Iosepe-save. Ki qova qaqtie vaio ivo? kio. Minki kumanka via vasausavaanavu vi uvaa ii voqamase naaku ikomankaa ki, visa uva kiva sa ho vaumanka vaua.

⁴ Visa minkima vauvo Iosepeva vainko aniake kumanka visa vainko anuvo Iosepeva kihao, Ke ni qakavano Iosepesama vai uo. Ne vo vakanaasa ki nimiha munima varomanta visa ki kivika vare maini Isipini vuu soave. ⁵ Ho vake ne sa ki aaku qekaake. Sa vi uvava kinavuqaa vaio ivo kiake. Kotiva vo vaiinki vo vaiinki sa quku viai qaqtie variake kio, ki kikikomanka ke naane maini ni nivuni aniaavaunaave. ⁶ Ntara sa variaina ihiva kaaraqantaqaima qovaama vio kaiqa vivo sauqu hiniu ihima qaqtie vaio ivo. Sauqu hiniu ihi vaiinki nahenki sama ho ntara ukuse qantu nevaave.

⁷ Ho Kotiva maa entaa iihaoma niara visavaka visa vainkintivaka sa quku viai qaqtie vaiqi vuake kio, ki naane maini kikikeo kiqonkaio viva ni saihaqama nimikaiae. ⁸ Ke viaa iihama sa niaa ne ki kikikaamanka anunaave kiaave. Kotiva ki vi aaraa aukimanka maini anunaave kiaave. Kotiva ki kikikaimanka maini ani vauo vivaqaima ki noaiqama saimanka ke Pero vaiinki via saiqa

vaiinki avuniaasama vai uo. Ke aiqava Pero vaiinki via vakaqaa raqisi vauausave. Ke aiqava Isipi vakanaasaqaa raqisi vauausave.

⁹ Ne sante vuu ki qoa kiva amiha minkima kiake: Ai maaquvano Iosepeva ariara minkima kivo, Kotiva ki noaiqama saimanka ke aiqava Isipi vakaqaa raqisiha vai uo. Are sa mini vaisea aniane. Vaasama ke iainanaini aniane.

¹⁰ Are homa maini Isipini vaihaa vaka vo Gosenini vainaave. Vi vakava ki aumankoma vaio ivo. Arevaka, nena vankivaanavuvaka, nena nainkinavuvaka, nena sipisipivaka, mimivaka, vurimakauvaka, nena aiaia vakenaavaka, aiqava vi ahasea vi ahasea saku varea maini ani vaiaqe ¹¹ ke aiqaa raqisiae. Ntara sa variaina ihiva sauqu hiniunavu qaqlima vaio ivo. Are sa maini aniea, aevaka are vakena ahasavavaka vehiqama vivo. Minkimama ki qoa kiva amiake, kio.

¹² Iosepeva minki kivaseo qaiqaa nai vasausavaanavuaa kihao, Nevaka ki qakavano Benaminivavaka ne ki kavaamanka ke ququaama Iosepesama vai uo. ¹³ Pero vaiinkivano ki noaiqama saina ne anirante ki qoa vuu kiva amiake. Ne aiqava ahase maini Isipini vaiha kaveavaka vuu ki qoa kiva amiake. Vi uvaa kiva amima, via vaasa vika varema maini aniae, kio.

¹⁴ Iosepeva minki kivaseo ou nai qaka Benaminia ukukeo iqi rake vauvo Benaminivavaka nai vasaara Iosepeaa iqi rakeo náikanta nai susuqe nai susuqe i vaua. ¹⁵ Iosepeva nai qaka suseqehao iqi rakehao ou nai vasausavaa vohaiqa vohaiqa susuqama nimikeo. Viva visa susuqama nimikomanka visa Iosepea vakamase uva ki vaua.

¹⁶ Iosepevavaka via qaka vasausavaanavuvaka uva ki vauvo Iosepea qaka vasausavaanavu an-into vasaasava Pero vaiinkivano vau naavuaqi vumanka Pero vaiinkivanovaka, via sana saiqa vaiinkivanovaka, vi ucaa iiha quaheha vaua.

¹⁷ Pero vaiinkivano Iosepea kiva amio kihao, Nena qaka vasausavaanavuaa minkima kiane, Ne nenka donkiqaa ntara vaa vaai rumpa vare anirante Kanaha vakaini ou vi ou ntema ¹⁸ nenka qoavaka, nenka vainki nahentivaka, ntika vare ourantema ke iainanaini kuvu vaiqe ke soqe vaka ni nimiai ne viaqaa vaiha soqemavi variake, kiane. ¹⁹ Nena qaka vasausavaanavuaa minki kivasea maa uvaavaka visa kiva nimiane: Ne mai-hai qosavaka qosa kaarivaka vare vuu saimanka ni vainki nahentivaka ni qovavaka viaqi vahama ho aniake. ²⁰ Nenta hini aiaia mini seraas sama noaiqamase iriake. Maini Isipini soqe aiaia vaia ni aiaiaqaima varianarove kiane, kio.

²¹ Pero vaiinkivano minki kuvo Iosepeva nai qaka vasausavaanavu qosanavuvaka qosa kaarinavuvaka nimumanka Pero vaiinkivano kuntemase, visa anirante vuama. Visa vie uvo Iosepeva visa aaraini viha ne ntaraavaka nimio, ²² visa vohaiqa vohaiqa qaraasa ukavaaqa nimio, Benaminia 300 silvaa munimavaka ukavaaqa sauqu hiniunavu vakama seo amio.

²³ Iosepeva nai qoavaka aiaia amikeo. Maa ahasanavua nai qoa amikeo: donki sauqu hiniukanta amio donkiqaa vo aiaia vo aiaia soqe aiaia Isipi vakaihaina vaa vaai donkiqaa rumpa keo donki vo sauqu hiniukanta nahe donki visavaka nai qoa amikeo, vo ntara vo ntara

mparetive, vo ntarave, via qova aaraini anihao naaina ntaraa vi donkiaqaa rumpa amikeo.

²⁴ Minkima seo rumpa amikeo Iosepeva nai qaka vasausavaanavu nikikomanka visa vie uvo Iosepeva visaa kihao, Ne aaraini viha sa nai aki nai aki iake, kivaseo visa nikikomanka vuama.

²⁵ Nikikomanka Iosepea qaka vasausavaanavu Isipi mini se ou vi Kanaha vakaini nái qova vau-naini ou ntoa. ²⁶ Mini ou nte visa nái qoa kiva ami kiha, Iosepeva qaqlima vaio ivo. Víva Isipini vaihao aiqava vi vakaqaa raqisihaoma vaio ivo, kinka. Visa minki kuvo Iakovova sa visa uvaa quaheo ne unahaama kiavo kumanka visa ²⁷ viaqaankai Iosepeva visa kiva nimu uvaa nái qoa kiva ami, Iosepeva qosa kaarinavu nimua nái qoa umiqovo visa qova Iakovova vi uvaa iio qosa kaarinavu kaveo, viaqaankaio via munkusavano soqe uvo viva quahaseo ²⁸ kihao, Ne quqaama kiavo. Ki maaquvano Iosepeva qaqlima vaio ivo. Saiqe ke qaqlima variainanko ou via kave, ho viaqaankai ke quku viaave, kio.

46

Iakovova Isipini saku vareo vua

¹ Iakovova minki kivaseo viva aiqava nai u ahassaa saku vareo Isipini vieva vua. Viva aaraini vihao Besebaini ou nteo Kotiva nai qoa Aisaakiaqaa raqisuva vauvoa kio, *ofaa* vaaseo Kotia iha quara amikoa.

² Kotia iha quara amikeo entaqi Iakovova vaike-hao kaira kave vauvo Kotiva via aarehao kihao, Iakovoo, Iakovoo, kuvo Iakovova kihao, Vo, ke mainima vai uo, kuvo ³ Kotiva viaa kihao,

Ke Kotisave. Ke ai qoa Vaiqavano vahama vi-aqaa raqisi vauausave. Are sa qekehaa Isipini vuane. Qaqi vuane. Are Isipini ou viaqe ke ai vainkinki airiqama saaima visa noaiqamavi noa vakanaasama variake.⁴ Are Isipini ou viaqe ke ainti vaiha aqaa raqisiqi vi naankiara Isipi vakaihai are suvuaama kerausa vika vare maini qaiqaa vuu saae. Naankiara are qukie ina entaa ai maaquvano Iosepeva ai vakamaseo vaiaama are quku vinaave, kio.

⁵ Kotiva minki kuvo Iakovova Beseba mini seo vua. Viva vieva umanka via maaqunavu Pero vaiinkivano qosa kaarinavu nimua varase, nái naakanavuvaka, nái vainkinavuvaka, nái qoa Iakovoavaka, viaqi visa ntuva vare Isipini vuama. ⁶ Visa Isipini vie iha visa Kanaha vakaini vaiha visa nái sipisipive vurimakauave mimive vakoa vare, aiaiavaka vakoa vare, Isipini vua. ⁷ Iakovova nai maaqunavuvaka nai nainkinavuvaka aiqava nai vainki nahenki ntika vareo Isipini vua.

⁸ Iakovoa vakamase vaiinki nahenki Isipini vusa, visa nuku vaieva minkimama vaio:
Rubeniva (Iakovoa maaqu ntara hunkavano)

⁹ Rubenia maaqunavu: Hanokiva, Paruva, Hesaroniva, Kaamiva.

¹⁰ Simioniva

Simonia maaqunavu: Jemueliva, Jaminiva, Ohaativa, Jakiniva, Sohaava, Sauriva.
(Kanaha vakanaa nahenki vovano Sauria vaka koa.)

¹¹ Rivaiva

Rivaia maaqunavu: Gesoniva, Kohaativa, Meraariva.

¹² Iutiva

Iutia maaqunavu: Eruva, Onaaniva, Seraava, Peresiva, Siraava. (Erusa Onaanisa Kanaha vakaini vaiha quku vua.)

Peresia maaqukanta: Hesaroniva, Hamuriva.

¹³ Isakaava

Isakaa maaqunavu: Toraava, Puvava, Iopuva, Simironiva.

¹⁴ Sebuluniva

Sebulunia maaqunavu: Seretiva, Eloniva, Iareriva.

¹⁵ (Rubenivavata, Simionivavaka, Rivaivavaka, Iutivavaka, Isakaavavata, Sebulunivavata, vinavusa Riaa maaqunavu vauvo Riaava Mesopotemiaini vaihao vi vainkinavusa Iakovo vaaka amikoa. Riaava nahenki vainki vo Daina vaaka koa. Riaava vainkivaka naintivata vaiesa 33 vaiinki nahenki vaua.)

¹⁶ Gaativa

Gaatira maaqunavu: Sifioniva, Hagiva, Suniva, Esiboniva, Eriva, Arodiva, Areliiva.

¹⁷ Aseva

Asea maaqunavu: Imunaava, Isavaava, Isaviva, Beriaava.

Asea raavuavano: Seraava.

Beriaa maaqukanta: Hebeva, Marakieriva.

¹⁸ (Vi vainkisa 16 navu Siripaa vainkive naintive vaua. Labaaniva Siripaa Riaa amuvo Siripaava Riaa saiqa nahenkivano vaua.

¹⁹ Iosepeva, Benjaminiva. (Vikanta Iakovo naaka Raikea maaqukanta vaua.)

²⁰ Iosepea maaqukanta: Manaseva, Efaraimuva.

(Iosepea naakavano Asenaativa vi vainkikanta vaaka koa. Asenaativa Potipea raavuavano

vauvo Potipeva Isipi vakanaa vaiinki nahenkiaa iihao suaiaa via vaiqavanove kivaseo via aare vau vaiinkiva vaihao vakusa vo Onini vaua.)

²¹ Benaminia maaqunavu: Belaava, Bekeva, Asabeliva, Geraava, Nemaaniva, Ehiva, Rosiva, Mupimuva, Hupumuva, Ativa.

²² (Vi vankinavusa 14 navu Iakovosa Raikesa vankivaka naintivata vaua.)

²³ Daaniva.

Daania maaqu Husimuva.

²⁴ Napataariva

Napataaria maaqunavu: Jaseliva, Guniva, Jeseva, Siremiva.

²⁵ (Vi vankisa 7 navu Bilihaa vankivaka naintivata vaua. Labaaniva Bilihaa Raikea amuvo Bilihaava Raikea saiqa nahenki-vano vaua.)

²⁶ Iakovoa vankivaka via naintivata Isipini vusa saara ntiea 66 navuma mini vua. ²⁷ Sa via maaqunavu naakanavu saara ntiae, qaqi via vankivaka via naintivata saara ntuvase 66 ve ki uo. Iakovoa vankive naintive Isipini vusavaka, Iakovoavaka, Iosepeavaka, Iosepea vankikanta Isipini vakakosavaka, visa visa saara ntiea visa 70 navuma vaua.

Iakovova nai vanki nahenki hampaka Isipini ou ntoa

²⁸ Iakovova Isipini ou vihao nai maaqu Iutia naane akikeo kihao, Are ou Iosepea kiao Gosenini ani kinavu kivikaiae, kivaseo via Iosepeva vau-naini akikovo vuvo ²⁹ Iosepeva nai qosa kaari henuqama vakoa viaqi vaai nteo nai qoa vika saeva Gosenini vio ou via vika seo nai qoa

ravaaqavu ukukeo via susuqama seo vusaiqama seo nai qoaa iqí raka amikeo.

³⁰ Iqi raka amikovo via qova Iakovova Iosepeaa kihao, Ho vake ke kenka kivuqo ai vii kave uo. Are quqaa qaqi variaama ki, ke quahehama quku viaave, kio.

³¹ Iakovova minki kuvo Iosepeva nai qaka vasausavaanavuvaka, nai qoa vainki nahenkinavuvaka, kiva nimio kihao, Ke ou Pero vaiinkivano vainanaini vaiha viaa minkima kieave: Ki qaka vasausavaanavuvaka, ki qoa vainki nahentivaka, visa Kanaha vakaini variasa visa ke unanaini anintaavo. ³² Vinavusa sipisipiqaave, mimiqaave, vurimakauuaqaave, raqisi vaiasave. Visa nái quaravaka aiaiavaka saku vare maini aniavo, kieave. ³³ Ke minki kivase Pero vaiinkivano amiaiao viaqaankaio viva ni irehao, Ne nana saiqa varaaasave? kiama ³⁴ ne minkima kiake, kenkanavu qoa aanante, kenavu vainki naakiusa vaiha sipisipiqaave mimiqaave raqisiqi vi vauausave, kiake. Ne minki kivo Pero vaiinkivano niara, Ne homa Gosenini nenkaraa vaiha nenka quara vakamase vaiqi vivaave, kianarove, kio. Isipi vakanaasa sa quaraqaa raqisi vaiinkisa hampaka vohaaraqi vaieave kuaa kio, Iosepeva minki kua.

47

Iosepea navunaasa hini usa Pero vaiinki ou kavoa

¹ Iosepeva minki kivaseo viva Pero vaiinkivano vaunaini vio ounteo via kiva amio kihao, Ki qovavaka ki qaka vasausavaanavuvaka Kanaha mini se, nái quaravaka nái aiaiavaka aiqava

varema maini Gosenini anintaavo, kivaseo
² viaqaankaio nai qaka vasausavaanavuqinkaio
 sauqu hiniunavu ntikeo Pero vaiinkivano
 vinavusa kavaaie kio, vinavusa vuu umiqoa.
³ Umiqovo Pero vaiinkivano vinavusa ireo kihao,
 Ne nenka maaqaini vaiha nana nana saiqa
 varaaasave? kio.

Minki kumanka vinavusa kiha, Kenavu
 kenkanavu qoa aanante quaraqaa raqisiqi vi
 vauausave, kinka. ⁴ Minki kivase vinavusa kiha,
 Kanaha vakainivaka sa ntara vaivo kinavu
 quaravano ntara naaiava sa vaimankaa ki,
 kenavu Gosenini vaieave, kinka.

⁵ Vinavusa minki kuvo Pero vaiinkivano Iose-
 peaa kihao, Ai qovavaka ai qaka vasausavaanavu-
 vaka are iananaini aniaivo. ⁶ Isipi vaka visa
 vakavakama varianarove. Are vaka soqea visa
 nimia visa nái quara vakamase mini variake.
 Visa qaqi saiamma Gosenini variake. Are kavaia
 visaqinkai vonavu vurimakauaqa raqisi saiqa
 anomase kavaivea, vi vaiinkinavusa homa ki
 vurimakauaqaavaka raqisivaave, kio.

⁷ Pero vaiinkivano minki kuvo Iosepeva nai
 qoa Iakovoa vimeo vuu Pero vaiinkivano vaunaini
 sovo Iakovova via uva mantovo ⁸ Pero vaiinkivano
 Iakovoa ireo kihao, Are nanki nankima ihie
 vaase iao? kio.

⁹ Minki kuvo Iakovova Pero vaiinkiaa kihao,
 Ke maa vakaaqaa vona vona vaiqi niha 130 ihi
 varase uo. Ki qovavaka ki saivaqavavaka airi ihi
 vakaini vaiqi vusa vaumanka ke sa visa aanante
 airi ihi vaiqi viai, ke vaiqi viha vusaai qukuqi viha
 mantaiqamavi vaiha vaiqi vunaave, kio. ¹⁰ Minki

kivaseo Iakovova nai sauqu kure ra seo Pero vaiinkiaa Kotiva ai soqema amikaaie kivaseo Pero vaiinki mini seo vuama.

¹¹ Iosepeva nai qoavaka nai qaka vasausavaanavuvaka ntika vareo Pero vaiinkivano kuntema seo, soqe vaka vaunaini visa vuu somanka mini vaua. Vi vakava aiqava Isipi vaka, vo vaka vo vaka aakara seo soqe vaka vauvo vakusa vo, Ramesesi kakaqa vaua. ¹² Iosepeva visa mini vuu seo nai qoavaka, nai qaka vasausavaanavuvaka, aiqava visa vainki nahentivaka, viva visa ntara nea nimumanka visa ho neha vaua.

Iosepeva ntara raira sehao vo vakanaa vo vakanaasa nimua

¹³ Vi entaa ntara sa qampiqovo Isipinivaka Kanaha vakainivaka sa ntara vaumanka vi vakanaasa vi vakanaasa ntaraa antuqa auvo sa visa mpeqa vaumanka vaiha ¹⁴ visa ou Iosepeva vaunaihai munima aquseha ntara varovo Iosepeva vi munimaa vareo Pero vaiinki amua.

¹⁵ Isipi vakanaasavaka Kanaha vakanaasavaka ntara varaesa munima aquqi vivi vuu nái munima kaiqa soa. Isipi vakanaasa Iosepeva vau-naini ou nte kiha, Umpo, ntara qaqi kinavu kimi-anne. Are ntara sa kinavu kimiaqe kenavu quku vuaoave. Kinavu munima kaiqama vivo. Umpo, qaqi kinavu saihaqiane, kinka.

¹⁶ Visa minki kuvo Iosepeva kihao, Ni munima sa vaiea, nenka quara ki kimihama ntara varaake, kumanka ¹⁷ visa nái qosave, sipisipive, mimive, vurimakauave, donkive, Iosepea amihama ntara varoa.

¹⁸ Vi ihia ntara sa vaumanka vi vakanaasa minkimaqi vuvo vo ihi anintomanka Isipi vakanaasa Iosepeva vaunaini qaiqaa ou nte kiha, Noa vaiinkio, kenavu maa uvaa quqeka saaoave. Kinavu munima kaiqama vivo kinavu quara vairi ainiqama vivo. Umpo, nana ahasee ai amiha ntara vararaave? Kintanavu vaakavanovaka kinavu vakavanovakaqaqima qaqlima vaio ivo.

¹⁹ Are sa kinavu ntara kimiqaqe kenavu quku vuaoave. Umpo, are kinavu saihaqiane. Kenavu kenkanavu vaka vakamase kaiqa vuaoave. Are ntara kinavu kimihaama kinavuvaka, kinavu vakavaka, varaaane. Kenavu Pero vaiinki karavusa vaiinki voqamaa vaiha via saiqa vaa amikaaiao kinavu vakavano viainiqama vuanarove. Ntaravaka suvuvaka kinavu kimiqaqe kenkanavu ukuseha namaqi viha qaqi variae, kinka.

²⁰ Sa ntara vau entava manta entaqai vau-mankaa ki, Isipi vakanaasa minki kuvo Iosepeva visa ntara nimihao Pero vaiinkiaa iihao visa vaka varovo visa vakavano Pero vaiinkiniqama vio.

²¹ Visa vakavano Pero vaiinki viainiqama vu-manka aiqava Isipi vakanaasa Pero vaiinki via saiqa varosaqai vaua. ²² Iosepeva ntara nimihao Isipi vakanaasa vaka vareo vo vaiinkinavu vakaqaqima sa varoa. Vi vaiinkinavusa Isipi vakanaasa vaiqa nuku kure re vau vaiinkisa vauvo Pero vaiinkivano visa ho variake kio munima visa nimi vauvoa kio, Iosepeva sa visa vaka varomanta visa nái vaka qaqi ukukoa.

²³ Iosepeva qaqi vaiinki nahenkiaa kihao, Ho ke ntara ni nimihama nivaka ni vakavaka varauo nevaka ni vakavanovaka Pero vaiinkiniqama

vivo. Ho maa ntara suvua vare vakaqi vuu ukuake. ²⁴ Ntaravano qampiqeo mpeqaiqia ne ntara qantu vare rairase, kaaraqanta kaaraqanta nenka ukuke, vohaiqa Pero vaiinki amiake. Ne hini ntara ukukeha homa namaqi viha qaiqaa qukuqi vivaave, kio.

²⁵ Iosepeva minki kumanka vi vakanaasa kiha, Noa vaiinkio, are ntara kinavu kimiaavea kenavu sa quku viai, qaqi vai uo. Umpo, are kinavu soqema kimikaarao. Kenavu homa Pero vaiinki via saiqa vaaqi viaave, kinka.

²⁶ Visa minki kuvo Iosepeva vi uvaa mpeqaiqama seo vakehao Isipi vakanaasaa kihao, Ne ntara ukukea nenka hini nehama hini Pero vaiinki amiake, kua. Maa entaavaka Iosepeva ki-vako uvava qaqima vaio. Isipi vakanaasa vaiqa nuku kure re vau vaiinkisaqaima nái vaka qaqi ukukeha vauvo visa vakavano sa Pero vaiinkiniqama vua.

²⁷ Iakovovavaka via vainki nahentivaka Gosenini vaiqi viha airi aiaia vakomanka visa vankintivaka airiqama vumanka visaa Isiraia vakanaasave kua.

²⁸ Iakovova Isipini 17 ihi vaiqio vio 147 ihi vaasova quku vua. ²⁹ Viva quku vuaia entava au-manko vauvo Iakovovave Isiraivave nai maaqu Iosepea aarama seo kiva amio kihao, Are nena sauqu aiqiqaa aqusehaama nena hini sauqu ki avuntaaqaa vakehaama kiriara kihaama, Sa ai Isipi vakaqi quntama kareave, kiane. ³⁰ Ke quku vuaiaa are ki vaaka varea Isipi maini sea ki qoavaka ki saivaqaavaka quntama keaqi ki vaakavaka vuu mini quntama kaane, kio.

Via qova minki kuvo Iosepeva kihao, Are kinantemase ke minkieave, kio. ³¹ Minki kuvo via qova kihao, Nena sauqu aiqiqaa aqusehaama ke quqaa minkieave kiane, kuvo Iosepeva ke quqaama minkieave kuvo viaqqaankaio Isiraiva nai kaintaqaa vaikehao Kotia auku kure rehao vaua.

**Isuva Soqe Uva Kuama
Genesis and the Gospels in the Arau dialect of the
North Tairora language of Papua New Guinea
Sampela hap Buk Baibel long tokples Arau long
Niugini**

copyright © 1986 Wycliffe Bible Translators, Inc.

Language: Arau (North Tairora)

Dialect: Arau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 11 Nov 2022 from source files
dated 22 Nov 2019

90947037-585d-5612-873d-36e338f0ae1b